

光緒江西通志

江西通志卷一百六十

列傳二十七 饒州府一

漢

吳芮秦時番陽令也甚得江湖間民心號曰番君黥布  
初歸芮芮妻之因舉兵應諸侯沛公攻南陽遇芮將梅  
鋗與偕攻析酈降之及項羽相王以芮率百越佐諸侯  
入關立芮爲衡山王項籍死高祖以鋗從入武關故德  
芮徙爲長沙王一年薨諡曰文王子成王臣嗣初文王  
芮高祖賢之制詔御史長沙王忠其定著令至孝惠時  
封芮庶子二人爲列侯傳國數世絕前漢書 白志舊  
陽令明一統志豫章書皆以芮爲番陽人又案梅鋗爲番  
芮將史記漢書不載何許人楚紀以爲長沙人粵大記  
以爲越人一統志云鋗偶軍山死葬梅港軍山在南豐  
縣南梅港在餘干縣人物志遂以鋗爲餘干人未敢信

也

陳靖字康叔餘汗人慷慨有大志憤王莽篡漢王常起  
往赴之會盜聚長山喻以順逆盜張案意氣頗異人靖  
舉酒喻曰漢室中顛君能爲國反正樹功當效薦引案  
謝曰敢不從命遂集義兵得千餘人赴常常大喜署爲  
中牙典軍校尉御戢有方得江湖人心常見光武首言  
靖功授散騎常侍以母老乞歸養封餘汗侯

豫章書

雷義字仲公鄱陽人初爲郡功曹擢舉善人不伐其功  
嘗濟人死罪罪者後以金謝之義不受金主伺義不在  
默投金於承塵上後葺理屋宇乃得金金主已死義乃  
以付縣曹後舉孝廉拜尚書侍郎有同時郎坐事當刑  
義默自表取其罪以此論司寇同臺郎覺之委位自上

乞贖義罪順帝詔皆除刑義歸舉茂才讓於陳重刺史  
不聽義遂佯狂出走不應命鄉里爲之語曰膠漆自謂  
堅不如雷與陳三府同時俱辟二人義遂爲守灌謁者  
使持節督郡國行風俗太守令長坐者凡七十人旋拜  
侍御史除南頓令卒官子授官至蒼梧太守

後漢書

張遐字子遠餘汗人七歲日記萬言年十一通易大義  
常從徐穉過陳蕃郭泰在坐會蕃問吳炳易太極炳曰  
太極在混沌之時蒙昧未分老子謂一物混成先天地  
生是也蕃然之又問遐遐曰易無定體強名太極太者  
至大之謂極者至要之謂蓋言其理至大至要在混沌  
之中一動而生陰陽陰陽者氣也所謂理生氣而氣寓  
夫理者是也泰顧炳曰遐得之矣蕃驚服爲舉孝廉補

郡功曹不就建甯閒爲五經博士遷鴻都門學士以疾  
還里著有易傳筮原龜原五經通義主義吳越春秋外  
記豫章書白志舊案張遐朴志以爲餘干人前志引  
王無田餘汗事惟嚴助傳載王諫伐閩越書有云越人  
欲爲變必先田餘干界中是餘干字亦見漢書但地理  
志本作汗又元和郡縣志隋開皇九年始去水從干則  
在漢時固應稱餘汗特不得援淮南王事以爲據耳  
謹案傳稱陳蕃問易以太極張遐論太極以理氣實漢  
儒說經所未能也自豫章書發之府縣志從而引之於  
是陳士業且於爲二千年來之創獲矣縣志於補功曹  
不就後尚有年十九師楊震云云三十九字而注其下  
云舊志注年十九以下語疑有誤蓋亦未嘗堅信府志  
并謂諸葛瞻蔣琬陸遜皆其門人尤見新異又兩漢經  
師從無爲五經博士者靈帝置鴻都門學所設者學生  
非學士稍涉史傳人人所共見也王謨文獻略不復置  
辨者亦過而存之意與

晉

陶侃字士行鄱陽人徙家尋陽早孤貧爲縣吏廬江太

守張夔察侃爲孝廉至洛陽數詣張華華與語異之除  
郎中尚書樂廣欲會荆陽士人武庫令黃慶進侃於廣  
人或非之慶曰此子終當遠到後舉侃補武岡令與太  
守呂岳有嫌棄官歸爲郡小中正會劉宏爲荊州刺史  
辟侃爲南蠻長史討賊張昌破之以軍功封東鄉侯陳  
敏之亂宏以侃爲江夏太守敏遣其弟恢來寇武昌侃  
出兵禦之所向必破以母憂去職服闋參東海王越軍  
事江州刺史華軼表侃爲揚武將軍使屯夏口元帝加  
侃奮威將軍遷龍驤將軍武昌太守流亡者歸之盈路  
侃竭資賑給焉帝使侃擊杜弼破之賊增兵來攻使朱  
伺等逆擊殺傷甚眾王敦表侃爲使持節留遠將軍南  
蠻校尉荊州刺史領西陽江夏武昌鎮沌口又移入沔

江遣朱伺等討江夏賊殺之王貢與杜曾舉兵反侃爲所敗坐免官以白衣領職復率周訪等進軍入湘使都尉楊舉爲先驅擊杜弢大破之敦奏復侃官王貢來降弢敗走進克長沙獲其將毛寶高寶梁堪而還王敦深忌侃功左轉廣州刺史以王廙爲荊州侃將鄭攀蘇溫馬儁等不欲南行西迎杜曾以距廙敦意攀承侃風旨將殺侃參軍梅陶長史陳頒言於敦曰周訪與侃親姻如左右手安有斷人左手而右手不應者乎敦意解侃便夜發進至始興杜宏與溫邵劉沈俱謀反侃擊破之以功封柴桑侯侃在州無事輒朝運百甓於齋外暮運於齋內人問其故答曰吾方致力中原過爾優逸恐不堪事太興初進號平南將軍尋加都督交州軍事進號

征南將軍開府儀同三司及王敦平遷都督荆雍益梁  
州諸軍事領護南蠻校尉征西大將軍荊州刺史侃性  
聰敏勤於吏職恭而近禮愛好人倫嘗語人曰大禹聖  
者乃惜寸陰至於眾人當惜分陰諸參佐或以戲談廢  
事乃命取其酒器蒲博之具悉投於江時造船木屑及  
竹頭悉令舉掌之咸不解所以會積雪始晴廳事前猶  
溼以屑布地及桓溫伐蜀以所貯竹頭作釘裝船其綜  
理微密皆此類也蘇峻作逆溫嶠邀侃同赴朝廷推爲  
盟主部將彭世斬峻於陣峻弟逸復聚眾侃與諸軍斬  
逸於石頭改封長沙郡公加都督交廣甯七州軍事以  
江陵偏遠移鎮巴陵遣諮議參軍張誕討五谿夷降之  
郭默矯詔襲殺平南將軍劉允輒領江州侃遣將軍朱



夏陳修率兵據淦口以大軍繼進默將宗侯縛默父子詣降侃斬默等詔侃都督江州領刺史侃移鎮武昌命張夔于隱爲參軍范逵于玠爲湘東太守辟劉宏曾孫安爲掾屬凡微時所荷一餐咸報遣子斌與南中郎將桓宣西伐樊城走石勒將郭敬使兄子臻竟陵太守李陽等共破新野遂平襄陽拜大將軍劍履上殿入朝不趨讚拜不名上表固讓疾篤又上表遜位以後事付右司馬王愷期侃輿車出臨津就船明日薨於樊谿年七十六諡曰桓尚書梅陶曰陶公機神明鑒似魏武忠順勤勞似孔明陸抗諸人不能及也謝安每言陶公雖用法而恆得法外意其爲世所重如此子十七人洪瞻夏旗斌稱範岱見舊史範最知名太元初爲光祿勳

書

陶瞻字道真少有才器歷廣陵相廬江建昌二郡太守遷散騎常侍都亭侯爲蘇峻所害追贈大鴻臚諡愍悼

晉書

陶臻侃兄子字彥遐有勇略智謀江州刺史華軼表侃爲揚武將軍使屯夏口又以臻爲參軍軼與元帝素不平臻懼難作託疾而歸白侃曰華彥夏有憂天下之志而才不足且與琅琊不平難將作矣侃怒遣臻還軼臻遂東歸於帝帝見之大悅命臻爲參軍後賜爵當陽亭侯咸和中爲南郡太守領南蠻校尉卒官追贈平南將

軍諡曰肅

晉書

陶輿侃兄子平南將軍臻弟果烈善戰以功累遷武威將軍初賊張奕本中州人元康中被差西征遇天下亂

遂留蜀至是率三百餘家欲就杜弢爲侃所獲諸將請殺其丁壯取其妻息輿曰此本官兵數經戰陣可赦之以爲用侃赦之以配輿及侃與杜弢戰敗賊以桔槔打沒官軍船艦軍中失色輿率輕舸出其上流以擊之所向輒剋賊又率眾焚侃輜重輿擊破之賊望見輿軍相謂曰避陶武威無敢當者後與杜弢戰被重創卒侃哭之慟曰喪吾家寶軍皆爲之垂泣詔贈長沙太守晉書范逵鄱陽孝廉嘗過陶侃時倉卒無以待賓其母截髮得雙髻以易酒餽樂飲極歡雖僕從亦過所望及去侃追送百餘里逵曰卿欲仕郡乎侃曰欲之困於無津耳逵過廬江太守張夔稱美之夔召爲樅陽令有能名遷主簿侃之聲名逵發之也仕至會稽太守晉書

宋

何漬餘汗人有膽略元嘉閒捕盧循將韓英有功授本

邑令

林志

梁

劉孝慶餘汗人侯景之亂湘東王繹起兵討景孝慶率  
土兵應之以功封餘汗男

安志

隋

袁贇鄱陽人大業閒兵亂倡義聚郭內居民相保守操  
師乞自新昌來攻城贇不支出居水南童敏故城與張  
善安大戰斬獲甚多武德初授懷州刺史

安志

唐

蔡明遠鄱陽人唐時爲本邑校顏真卿絕糧明遠載米

濟之真卿憐其意手書以贈盛傳於世

安志謝志舊案前志載林士

宏爲唐饒州人物之首考唐書士宏於隋末竊據江西改元僭號故削

陳饒奴饒州人年十二親亡寡弱居喪又歲饑或教其

分弟妹可全性命饒奴流涕身囚訴相全養刺史李復

異之給資儲署其門曰孝友童子

唐書謝志舊案唐書孝友傳尚有鄱陽

張讚樂平謝維勤皆著孝弟朝廷旌閭賜粟帛州縣存問復賦稅附識於此

吉中孚鄱陽人事親至孝第進士授萬年尉又登宏詞

科厯官至諫議大夫戶部侍郎與盧綸韓翃錢起司空

曙苗發崔峒耿漳夏侯審李端皆能詩齊名號大厯十

才子貞元初卒

唐書才子傳

李儼字雅之餘干人大厯進士德宗時爲左司諫方士

桑道茂奏奉天有天子氣上欲屠其城儼諫曰陛下始

登元極當懲忿室慾選賢任能以安社稷乃輕信妖言以害生靈乞斬道茂上悟乃止遷浙西節度判官歲饑

活數萬人

林志

姜嶠樂平人性至孝庭生連理樹刺史韋頌署曰孝行有聞兄弟兼美陶我王化毓此休祥

林志

張鵬德興人宣宗時爲河南節度書記吐蕃賀繼部落犯邊堡鵬率數千騎敗之上嘉之賜朱衣金魚懿宗立表爲瓊管五州招討使人爲羽林金吾二將軍屬蠻人渡瀘鵬疏谿洞情狀攻守備用出爲邕州刺史制置使尋拜嶺南西道節度使

豫章書

張敖德興人善韜略咸通閒官節度使唐時節度專擅國命咸通後雖么麼無不牽連爲逆敖獨守正奉公拓

境興學驅浮屠爲民盡人臣職事人多其忠征西夏有

功封饒郡公晉上柱國

人物志

謹案敖官節度不詳何鎮西夏之稱北宋始見舊志

所錄不能無疑

黃勉德興人咸通十四年黃巢寇長官勉與李克用合

兵討之有功後追封保靈王

人物志

謹案舊志黃勉後有李濤傳並附案云濤

章書無李濤

人物志亦不詳

何許人今考十國春秋李濤實趙州人官至雄武右統軍故刪

甯贛鄱陽人同弟襄聚義兵拒黃巢保饒歙二州以功

官御史大夫

豫章書

余鐸餘干人唐尚書勅六世孫乾符二年黃巢陷饒州

所至焚蕩鐸與鄱陽彭幼璋起義兵保障於白雲城下

巢黨復來屢出奇拒之民賴保全立祠祀之

林志

董全植德興人天祐中爲殿中御史時朱溫鎮唐淮南

節度使楊渥檄傳興復全楨兼八砦將首分守鄱陽賊忽自浙至兵寡戰敗乃自斷其首已而雷電晦暝如有戈甲甚盛賊大驚潰全楨猶於馬上自挈其首以歸邑人廟祀之

豫章書

沈普樂平人以孝聞居親喪所居及墓俱產芝草

安志

### 後晉 南唐 附

童發字以達德興人博學有宏度仕後晉爲都統功曹

尚書僕射天福閒契丹寇中原後漢劉智遠自立以攻

元問發發流涕乃悟仍稱天福曰予不敢忘晉

林志謹案童

發新舊五代史無傳劉智遠起兵稱天福特不用出帝年號耳非不忘晉也舊志語近附會官名尤舛存疑

李德柔字子懷鄱陽人性鯁直不阿爲大理寺卿時元

宗欲置北寺獄諫曰世豈乏士使閹寺得弄文墨耶議



遂寢

林志

李延鄒鄱陽人爲滁州錄事參軍時周世宗盡取淮北州郡滁州危急團練使郭廷謂欲降命延鄒草降表延鄒責以忠義廷謂以兵臨之延鄒擲筆曰大丈夫終不負國爲叛臣作降表廷謂殺之唐主命其子以官人物志周惟簡鄱陽人隱居明易後主聞其名起布衣爲集賢殿侍講以虞部郎中致仕還山金陵被圍思得奇士可使兵閒者起授給事中副徐鉉使宋太祖召見惟簡奏曰臣本野人未嘗與聞使指伏聞終南山多靈藥願得棲隱太祖許之金陵平命爲國子博士久之上表請解

官遂初志

唐餘紀傳

宋

湯夏字起翁安仁人天聖進士倅黃州築城禦僂智高

厯知泗泉宣三州有政聲仁宗手敕褒美

人物志

金君卿字正叔浮梁人慶厯進士厯官祕書丞知臨川

權江西提刑入爲度支郎中嘗著易說有文集十五卷

林志

馬遵字仲塗樂平人嘗以監察御史爲江淮發運判官

就遷殿中侍御史爲副使以言事謫知宣州後復爲右

司諫以禮部員外兼侍御史知雜事改吏部直龍圖閣

性樂易喜議論其言事不爲激訐杜衍范仲淹皆稱道

之

宋史 白志 舊宋馬遵事蹟宋史所載止於此人物志敘其彈宰相梁適及爭歐陽修賈黯等補外事不知何據

今刪

熊本字伯通鄱陽人慶厯進士熙甯初瀟川羅晏夷叛

以本察訪梓夔兩路本曰彼能擾邊者以十二部之眾  
乃誘其酋領誅之諸夷皆從風而靡願世爲漢官奴神  
宗曰熊本不傷財不病民一旦去百年之患檄奏詳明  
可嘉也河湟初復以本爲秦鳳路都轉運使奏省官百  
四十員減浮費數十萬渝州南川獠人木斗叛詔本安  
撫夔路木斗以秦州地歸得五百里爲四砦九堡建南  
平軍元豐中知滁州廣州召拜工部侍郎會宜州蠻擾  
邊道除龍圖閣待制知桂州至則谿洞酋長請選將練  
土兵以代戍守益市馬以足騎兵宜州遂無事召爲吏  
部侍郎以疾乞補外除龍圖閣待制知洪州再知杭州  
未幾卒有文集奏議共八十卷

東都事略

王仲舒字茂先浮梁人慶厯進士厯越州推官池州軍

判攝彭縣移宿州推守攝符離縣處煩治劇有能名以  
包拯薦遷昭義節度推官再遷太子中允賜五品服以  
疾辭熙甯歲饑勅分給食卒贈朝奉大夫著有野人集

人物志

章穀字仲弓餘干人慶厯進士授興遠簿遷資州軍事  
判官著作郎賜緋衣銀魚通判秀州船寇千餘殺掠沿  
海州郡呈制置司得軍二千人又鄉兵二千人出隘口  
防禦寇至督戰瀕死又明日寇大至與戰大敗之生擒  
二百人斬首三百人民始甯未幾以疾卒

人物志

程適字遵塗樂平人仁宗朝以恩調尉再調簿三調錄  
參一朝棄官請老朝廷方崇激廉退擢適太子中舍制  
詞褒美英宗登極進勳騎都尉賜緋魚

人物志

張日新安仁人皇祐間爲廣西邕州都監儂智高陷邕日新力戰不支被執不屈死

林志

程節字信叔浮梁人嘉祐進士熙寧開朝廷有事南方單騎銜命撫諭諸蠻上語苗時中曰程節眞奇才遷廣西運使帥桂府甚得蠻情官至寶文閣待制著有竹溪集子鄰字欽之亦負將才節卒諸蠻反側廷議以鄰代

蠻帖服如初

林志

程筠字德林節弟嘉祐進士授縣令時新法方行筠條其不便訓知陳留均田賦平徭役不避權勢戚里訴之太后曰筠廉吏吾可撓其政耶擢戶部郎中知眞州蘇軾美之以詩有君爲赤縣有古風政聲直入明光宮之

句

林志

張綬字文結德興人嘉祐進士權將作監丞按實昭宣使宋用臣不法事神宗直之後除太府少卿蔡京議置大錢綬力諫不便曰慶厯已行矣自是忤權臣久厯外任著有梅堂詩集

林志

彭汝礪字器資鄱陽人治平中舉進士第一王安石得其所著詩義善之以爲國子監直講擢監察御史裏行汝礪首陳十事曰正己任人守合理財養民振救興事變法青苗鹽事指擿利害多人所難言者王中正李憲臨邊汝礪曰漢唐以兵付中人多致敗事神宗折之汝礪拱立不動伺閒復言神宗卒爲改容罷爲江西轉運判官久之代還爲京西路提點刑獄元祐中拜中書舍人吳處厚繳進蔡確詩諫官交章請治汝礪曰此羅織

之漸也且上疏論列已而確有謫命汝礪遂罷知滁州  
召爲兵部侍郎徙刑部會有巨獄汝礪以爲不可殺與  
執政異徙禮部又徙吏部紹聖初進尚書言者謂汝礪  
附會劉摯罷爲寶文閣直學士知成都府又降待制知  
江州卒年五十四汝礪居家孝友與人寡合然有志於  
善平時與蔡確異趣確被貶又爲之力辨人以此賢之  
所著有易義詩義奏議詩文五十卷

宋史

周文敏安仁人篤學敦行不求聞達嘗與周濂溪講性  
理之學於廬山濂溪起敬曰周君自是一團和氣門人  
侍郎天臺劉洪誌其墓曰直氣摩虹古人之風萬卷蟠

胸學者之宗

人物志

彭汝方字直老汝礪之弟以蔭補太廟齋郎後知衢州

時方臘陷歙睦杭而衢介於三郡之閒賊勢張甚兵力  
寡弱眾皆奔潰汝方與郡僚段處約守孤城城陷罵賊  
而死年七十一贈龍圖閣直學士

東都事略 白志舊案宋史汝方諡忠毅

謹案直老宋史作宜老太廟齋郎宋史作蔭爲榮陽尉蓋由齋郎出尉榮陽也

張吉郿陽人母方娠其父同客遊西蜀不還吉爲兒時  
與彭汝礪同學嘗有詩云應是子規啼不到至今我父  
未歸家及長入蜀尋父往返者三其父遂以熙甯十年  
歸自蜀彭汝礪贈以詩云河可以竭山可徙我翁不歸  
行不已三往三復翁歸止翁行方壯今老矣兒昔未生

今壯齒

郿陽集

董鉞字毅夫德興人治平進士任夔州轉運使遇事剛  
果耿介不羣致仕歸過黃州蘇軾和鉞歸去來詞有左



手引妻子右手抱琴書之句鉞自奉清約家無僭石儲

所積惟圖書滿篋而已

人物志

董乂字彥臣德興人治平進士累官大理寺卿進樂書

釋青囊經遷敷文閣待制封華亭縣開國男哲宗累賜

劄問

林志

史邈字守易浮梁人行端學博熙甯進士爲司農主簿

王安石薦其才神宗召對與語大悅之擢兵部郎中太

平通判後以議新法不合退而授徒講學遠近翕然從

之號曰江東夫子

人物志

洪彥昇字仲達樂平人元豐登第調常熟尉歷殿中侍

御史孤立任言責論蔡京再居元宰假紹述之名敗壞

先朝法度朋奸誤國公私困敝願蚤賜英斷遣之出京

何執中緣潛邸之舊德薄位尊願解其機政以全晚節  
遷給事中嘗謁告一日而張商英復官之旨經門下言  
者以爲顧避封駁出知滁州尋加右文殿修撰進徽猷

閣待制知吉州久之知潭州未行卒

宋史

朱尹字湯輔浮梁人舉元豐神童科召入禁欽慈皇后  
置膝上而撫之賜金錢玉果歷潭州司戶參軍零陵令  
辟句當公事進比部郎中建炎閒使江淮上曰卿文學

政事有聞於時所以選委

人物志

謹案浮梁縣志當  
駁通志旣列朱尹於元符解

試又載此傳欽慈皇后云云考欽慈元  
豐閒爲神宗美人至元符薨已久矣

程博文樂平人舉進士王安石當國問趙抃江南人物  
抃以博文對自開封戶曹擢爲條例司首上豢羊事歲  
減費十八萬緡出知南劍州州有灘甚險博文請以度

牒募僧鑿治妖氛起龍門博文縱囚使擊賊自效賊平  
囚亦如期還積官至司農少卿湖南運判

林志

都隨字與時餘干人元豐進士有節操嘗以太常少卿  
使遼宣上威德遼使至亟問隨起居稱曰長者官至宗

正少卿

林志

張根字知常德興人甫冠第進士調臨江司理參軍遂  
昌令當改京秩以四親在堂冀以父母之恩封大父母  
而馳妻封及母遂致仕得通直郎如其志時年三十一  
鄉人賢之屏處十年曾布曾肇鄒浩及本道使者上其  
行義徽宗召詣闕上言請罷錢塘製造局未幾通判杭  
州提舉江西常平言本道去歲捐租四十萬而戶部責  
償如初祖宗立法運上供額而給本錢數百萬緡使廣

糴以待用比希恩者乃獻爲羨餘故歲計不足至爲無  
名之斂詔貸所蠲租而以糴本錢還之六路改淮南轉  
運使以水災多乞蠲租賦散常平青苗米賑貸流民後  
以朝散大夫終於家

宋史

張樸字見素根之弟以進士歷官太常少卿侍御史鄭  
居中去位樸言朋黨分攻非朝廷福又劾郎員庸繆者  
十六人斥諸外升祕書少監

林志

鍾傳字弱翁樂平人本書生用李憲薦爲蘭州推官紹  
聖中入對命幹當熙河涇原秦鳳三略公事夏人陷金  
明渭帥毛漸出兵攻其沒湮砦傳合擊破之又與燕州  
王文郁進築西安城論功加祕閣校理章奏帥渭命傳  
所置將苗履統眾會涇原之靈平夏人悉力來拒傳步

騎二萬出不意造河梁以濟師遂作金城關又獻白草  
原捷連進集賢殿修撰知熙州傅自始仕至此僅再歲  
遂擅帥熙秦俄責監永州稅再貶連州崇甯中復起知  
河中府歷鄆瀛渭三州擢顯謨閣待制歷知杭州真定  
永興太原延安府以故職卒

宋史

謝志舊案傅雖因李憲章惇薦得官然立功

西夏故應錄之

都頡字光遠餘干人少貧苦學讀書過目輒成誦元祐  
中嘗作七談述番陽山川人物之盛三千餘言七日而  
成辭豔意遠自謂比太沖十稔平子十二而無歉官至  
奉朝請司農少卿

人物志

馬存字子才樂平人元祐省試論以揚雄劉向爲題存  
論曰方王莽以險怪愚弄天下學士大夫高節尚潔者

非引去則繼以死龔勝以清死鮑宣以悍死其憤甚矣  
雄斯時方著劇秦美新論以發揚其盛讚之令人氣拂  
膺不懌者累日嗚乎雄乎甯死爾其忍爲此文哉典舉  
蘇軾奇之置高等京師競傳因呼爲拂膺公廷試策言  
臣之深思常略於東南而獨在北方詳定官蘇轍喜其  
遠慮欲以冠多士同列閒之抑居第四授鎮南節度推  
官再調越州觀察推官紹聖三年卒存蚤遊太學研經  
以考道觀史以究治亂之變搖毫頃刻數千言文學錦  
一時文集二十卷行世

人物志

章公弼字右夫餘千人紹聖進士授建甯主簿聞朝廷  
廢劉摯范純仁託疾不起丁母憂廬墓三年以御史趙  
挺之薦累官禮部侍郎以疾歸有文集若干卷

林志

金極字克中樂平人紹聖進士宰分宜上書乞斬蔡京以謝天下坐是廢錮久之方得解適意閒曠以市隱自號扁其廬曰醉鄉紹興初詔贈太常博士

林志

許中字與極樂平人元符進士與修會要六家謚法書成除校書郎歷兵部官出知虔桂二州進直寶文閣歷知鼎桂揚三州再知虔州在虔則繕治城隍在桂則撫綏峽峒在鼎則截總餉以寬民力在揚則拓泮宮以淑青衿置義塚以收白骨敷歷中外多善蹟

人物志

程瑀字伯寓浮梁人其姑臧氏婦養瑀以爲子姑沒始復本姓少有聲太學試爲第一累官至校書郎爲臧氏父母服服闋除兵部員外郎金人入侵求可使者瑀請往未行會欽宗即位議割三鎮命瑀往河東秦檜往河

中瑀奏臣願奉使不願割地不報至中山諸將已得密  
諭城守不下瑀與金使王訥俱至燕山還除左正言金  
幹離不與粘罕爭功故幹離不欲和粘罕欲戰朝廷遣  
人齎蠟書約余覲皆爲粘罕所得瑀因言金兵圍我重  
鎮數月不能解豈能出塞共謀人之國莫若遣使議和  
然後謹飭邊備徐觀其變帝嘉納之高宗卽位召爲司  
封員外郎遷光祿少卿國子司業請祠主管亳州明道  
宮尋召赴行在條上十四事皆切時務以數文閣待制  
知信州胡安國劉一止言瑀忠信可以備獻納正直可  
以司風憲不宜去遂復留未幾以徽猷閣待制知撫州  
提舉江州太平興國宮居父母喪服除知嚴州徙宣州  
復奉祠俄召赴行在除兵部侍郎兼侍讀晉兵部尚書



檜旣主和瑀議論不專以和爲是檜忌之改龍圖閣學

士知信州降朝議大夫卒年六十六有奏議六卷

宋史

程不器樂平人元符進士出守廣德時方臘兵熾廣德  
實兵衝增陴浚隍峙糧練士爲守戰計臘知有備引去  
子移忠字孝嚴以父蔭入官歷建德尉池州戶曹戢奸  
束吏有能譽親嘗寢疾七年移忠夜不解帶視湯藥執

喪癯憊過制以孝名

人物志

張甲字大用德興人建中靖國時爲邕州巡檢政和中  
金兵犯順力戰死德祐元年詔贈忠利侯

林志

洪楫字元濟樂平人累官直祕閣充編修國史靖康後  
乞祠里居適趣林泉起知撫太平二州料州兵以平剽  
盜發義廩以活饑民恩威甚著性雅淡爲政不務赫赫

聲人物

董濬字禹川德興人崇甯進士除太學錄徽宗賜對陳  
治道千餘言授祕書少監時有東宮官奏罷讀孟子濬  
力詆其非謂使東宮獨不得聞仁義之言堯舜之道乞  
罷言者上善之出爲江西提刑知興仁府召對言爲治  
在於力行先自治以定大業數百言尋請老所著有五  
行新書周官辨疑大成書

林志

張擴字彥實德興人崇甯進士授國子監簿遷博士調  
處州司工曹事盜賊竊發守知其賢委以郡擴臨事精  
明威名大著召爲祕書省校書郎尋充館職因議和固  
執以爲不可遂求補外

人物志

方孟卿字正夫德興人崇甯進士擢直徽猷閣出爲淮

南荆湖轉運使值金兵至淵聖密召諸路入援孟卿募

兵赴難遷右司諫所著有奏議十卷

林志

余應球

一作求

字國器德興人崇甯進士歷官監察御史

奉旨言事三月閒六十餘疏權奸忌之謫監達州茶稅

召爲吏部員外郎遷朝議大夫封鄱陽縣開國男

林志

李轍字遵道浮梁人崇甯進士歷知巴陵俗薄惡至父

子異居轍躬示孝弟俗遂變調繁昌時國步艱難民力

凋瘵煦煦撫循惟恐不及歲嘗歉稱貸以給足每郡調

苛急多沮格以身當之卒於官民悼而祀焉

林志

汪天任字莘老浮梁人大觀進士歷知汀州時方行王

安石字說天任獨守六經不變所著有易說語孟新意

林志

陶節夫字子禮鄱陽人晉大司馬侃之裔第進士起家爲廣州錄事參軍知新會縣廣守章案重其材案帥涇原辟入府崇甯初爲講議司檢討官進虞部員外郎遷陝西轉運副使徙知延安府招降羌有功築石堡等四城石堡以天瀾爲隍可趨惟一路夏人害粟其閒以千數旣爲宋有其酋驚曰漢家取我金窟竭亟發鐵騎來爭節夫分部將士遮禦之斬獲統軍以下數十百人擢顯謨閣待制龍圖閣直學士方議城銀州謀告夏人已東節夫料必西趨涇原遣裨將耿端彥疾驅至銀州五日成城夏人果從涇原至則城備已固遂遁去進樞密直學士尋領經制環慶涇原河東邊事言今旣得石堡又城銀州西夏洪宥皆在吾顧盼中橫山之城十有八

九興州巢穴淺露直可以計取遂陳取興靈之策會朝廷罷經制司且棄所城地節夫乃求內郡徙洪州改江甯府歷青泰二州知永興軍卒

宋史

李椿年字仲永浮梁人政和進士歷官度支郎中除顯謨閣兩浙運使檢括隱漏別爲圖籍凡二十四條該盡田畝形勢閱七月告成升戶部侍郎權吏兵兩部封普甯郡開國侯所著有易說及文集

林志

程達字彥通浮梁人性好學老彌篤登第入官輒乞祠樂於教人多所成就所著有易解語孟直解五經解題

林志

程汝能字公才德興人端蒙之祖天資純篤不由學問孝弟忠信自有以絕人母得末疾三年衣不解帶處家

慈愛而能嚴子弟不敢爲非理事沒三十年鄉人言之

猶有出涕者父宏亦有鄉行

朱子集

柴元裕字益之餘千人

一作陽人

通五經尤長於易以窮

理盡性爲本四方從學者眾湯漢饒魯李伯玉皆其門人所著有春秋尚書論語解易繫中庸大學說宋名臣傳題所居齋曰強恕門人稱曰強恕先生

林志

汪藻字彥章德興人入太學中進士第調婺州觀察推官稍遷江西提舉學事司幹當公事尋除九域圖志所編修官再遷著作佐郎出通判宣州提點江州太平觀投閒凡八年高宗踐祚召試中書舍人時次揚州藻多論奏宰相黃潛善惡之遂假他事免爲集英殿修撰提舉太平觀明年復召爲中書舍人兼直學士院擢給事

中遷兵部侍郎兼侍講拜翰林學士屬時多事詔令類  
出其手嘗論諸大將擁重兵寢成外重之勢且陳所以  
待將帥者三事後十年卒如其策紹興二年除龍圖閣  
直學士知湖州上言古者有國必有史故書榻前議論  
之辭則有時政記錄柱下見聞之實則有起居注類而  
次之謂之日歷修而成之謂之實錄今踰二十年無復  
日歷何以示來世乞卽臣所領州許臣訪尋故家文書  
纂集元符庚辰以來詔旨爲日歷之備制可尋貶秩停  
官予祠六年修撰范冲言日歷國之大典比詔藻纂修  
事復中止恐遂散逸宜令就開復卒前業詔賜史館修  
撰錢聽辟屬類編八年上所修書自元符庚辰至宣  
和乙巳詔旨凡六百六十五卷升顯謨閣學士遣僞

茶藥尋知徽州徙宣州言者論其嘗爲蔡京王黼之客  
奪職居永州卒二十八年徽宗實錄成書右僕射湯思  
退言藻嘗纂集詔旨比修實錄所取十蓋七八深有力  
於斯文詔贈端明殿學士藻通顯三十年無屋廬以居  
博極羣書老不釋卷尤喜讀春秋左氏傳及西漢書工  
儷語多著述所爲制詞人多傳誦

宋史

許尹字覺民樂平人政和進士厯知興化永處柳邛五  
州皆有善政高宗時攝蜀帥甚得人心進司農卿總川  
賦不忍重股民力以便宜積財粟孝宗卽位尹奏乞延  
儒臣講求治道尋以敷文閣學士致仕有文集數十卷

林志

鮑昱字季明浮梁人政和進士厯辰荆洪州教宰祁門



通判融州時帑庾匱竭昱攝州事戢奸貪謹出入用日以饒乃新學宮申教令上下翕然譽之移和州除江南東路安撫制置司參議昱有定力不爲浮議所惑故所至有聲子安行安國孫升之俱登進士第

林志

許亢宗字幹譽樂平人登政和第初授揚子尉入爲國子博士同編修九域志轉太常博士遷司封員外郎金始與宋講交聘命亢宗充賀生辰使夾攻之捷金雖歸我幽燕實謀深入使還及疆彼已轉糧發兵躡其後亢宗入覲密以聞大臣方誇邊功不聽靖康初擢起居舍

人尋請祠

人物志

李潤字仲行浮梁人政和進士歷官司封員外郎言選法朝廷是之權吏部侍郎以人才困於資格選法壞於

因循延訪汲引剗弊殆盡嘗使金歸述山川關寨以備

異日屯守上慰勞之官終敷文閣待制

林志

鮑琚字德彰浮梁人政和進士攝安仁令召除軍器監

使鈎考東南財賦琚收分閫兵入直宿衛遷右司員外

郎進直敷文閣知鎮江改廬州兼淮南安撫使

林志

胡涓字霖卿鄱陽人政和原誤靖康進士丞遂昌縣以生民

利弊爲念縣治距溪不數步而儒學切近其側每霖雨

溪流漲溢則隄湍齧害涓因訪舊龍圖張根所築隄趾

而修葺之身自董役隄成百姓蒙其利

人物志謹案浮梁縣志涓浮

梁人省志依府志稱鄱陽人且誤書靖康進士而於選舉則稱樂平人入政和五年榜攷靖康紀元僅二年無

進士當以政和爲正

洪皓字光弼鄱陽人少有奇節政和進士建炎三年帝

將如金陵皓上書言內患甫平外敵方熾若輕至建康恐金人乘虛侵軼宜先遣近臣往經營俟告辦回鑾未晚時朝議已定不從他日帝問宰輔近諫移蹕者爲誰張浚以皓對時議遣使金國浚又薦皓擢徽猷閣待制假禮部尚書爲大金通問使至太原留幾一年金遇使人禮日薄及至雲中粘罕迫二使仕劉豫皓曰萬里銜命不得奉兩宮南歸恨力不能磔逆豫忍事之耶粘罕怒流遞冷山雲中至冷山行六十日距金主所都僅百里地苦寒四月草生八月已雪穴居百家陳王悟室聚落也悟室使皓教其八子或二年不給食盛夏衣毳布嘗大雪薪盡以馬矢然火煨麪食之金主以生子大赦許使人還鄉皓與張邵朱弁三人在遣中金人懼爲患

猶遣人追之及淮而皓已登舟十二年七月見於內殿  
力求郡養母皓自建炎己酉出使留北中凡十五年同  
時使者十三人惟皓邵弁得生還而忠義之聲聞於天  
下者獨皓而已八月除徽猷閣直學士提舉萬壽觀兼  
權直學士院侍御史李文會劾皓不省母出知饒州尋  
居母喪言者猶謂皓睥睨鈞衡終喪除饒州通判李勤  
又附檜誣皓作欺世蜚語責濠州團練副使安置英州  
徙袁州至南雄卒年六十八帝聞嗟惜之復敷文閣學  
士諡忠宣皓雖久在北廷不堪其苦然爲金人所敬所  
著詩文爭鈔誦求鉅梓旣歸後使者至必問皓爲何官  
居何地惟爲檜所嫉不死於敵國乃死於讒慝皓博學  
強記有文集五十卷及帝王通要姓氏指南松漠紀聞

金國文具錄等書

宋史

魏安行字彥成樂平人以進士授善化丞乞治劇自效得宰弋陽鑿渠洩水以灌民德之張浚薦知滁州滁當兵後景象荒耗安行至浸成樂土改京西漕言事忤時相謫官起知吉州治行爲江右冠除戶部郎中進屯田十二策擢直敷文閣淮南運副提領營田事尋請祠卒

林志

張燾字子公根之子宣和八年進士第三人靖康元年李綱爲親征行營使辟燾入幕建炎初通判湖州明受之變賊矯詔俾燾撫諭江浙燾不受上旣復辟遷中書舍人以集英殿修撰提舉江州太平觀明年以兵部侍郎召金使張通古蕭哲至行在朝議欲上拜金詔燾曰

陛下信王倫之虛詐發自聖斷不復謀議便欲行禮羣臣震懼罔措必已得梓宮已得母后已得宗族始可議通好經久之禮今彼特以通好爲說意謂割地講和而已奈何遽欲屈而聽之一屈之後不可復伸廷臣莫能正救曾魯仲連之不如豈不獲罪於天下萬世秦檜患之燾亦自知得罪託疾在告和議成范如圭請遣使朝入陵遂命判大宗正士儂與燾偕行九年五月至永安諸陵朝謁如禮自鄭州厯汴宋宿泗淮南以歸所言皆切中時病秦檜方主和惟恐少忤敵意悉置不問成都謀帥上曰張燾可第道遠恐其憚行檜以諭燾燾曰君命也焉敢辭十月以質文閣學士知成都府兼本路安撫使尋乞祠以李玘代之燾自蜀歸臥家凡十有三年

檜死舊人在者皆起。燾除知建康府。居二年。進端明殿學士。兼侍講。以疾力辭。不許。除吏部尚書。金使施宜生來。燾奉詔館客。宜生本閩人。燾以首邱桑梓。動之。宜生於是漏敵情。燾密奏。早爲備。遷大中大夫。復知建康府。隆興元年。遷參知政事。以老病。不拜。臺諫交章留之。除資政殿大學士。提舉萬壽觀。及家固求致仕。卒。年七十。

五諡忠定

宋史

徐衡字季平。樂平人。以進士業遊太學。遇朝建武學。慷慨讀孫吳書。試中武舉第一。薦擢右職。重和元年秋。諸路大水。時衡司江東西廉訪。因命任兩路賑濟。衡籍官民廩得粟五百萬斛。錢十五萬緡。又截留上供米。隨所在貶之。計口給貧多。所存活又治舟楫以濟涉。醫藥以

療病葬埋以卹死施舍以免責獨賦緩刑皆且奏且行之詔下其法於諸路尋提點謝志誤典廣東刑獄廣有鉅盜劉隆者猖獗十年爲一方患衡單車造壁賊遂出降人物志

張杞字南軒德興人宣和進士授登州牟平縣尉靖康之變從二帝北狩七年乃謀航海厯八月登錢塘岸調婺州司理參軍有童子六七人以瓦石相擊誤殺一人首從不分將盡置法杞曰童子何知一日殺數人吾不忍卒從輕論改以薦擢監察御史厯吏部侍郎典銓無私搢紳歸重紹興己巳充金國信使敕賜笏帶名馬以寵其行還升吏部尚書封永甯郡開國男人物志

程振字伯起樂平人少有俊才徽宗幸太學振以諸生



高第得官提舉京東西路學事振奏立孟子祠以公孫丑萬章樂正克等從祀入爲監察御史兼太子舍人初見太子言古者大祭祀登餽受爵必以上嗣旣禮經所載元豐彝典具存昨上有事明堂而殿下不與非所以尊宗廟重社稷太子矍然曰初無人及此者由是驟加獎重欽宗受禪召拜吏部侍郎及聞金寇河北力請合諸路兵犄角擊之以牽其勢且曰彼猖獗如此陛下猶欲守和議而不使之少有所懲創乎欽宗是其言不能盡用也爲刑部侍郎金邀天子幸其營求金不已振與梅執禮等四人同死之年五十七振天姿和厚有醕藉至論事則挺然不可回奪方徽宗崇尚道家之說振至東宮從容及之曰周公作鴟鴞之詩孔子以爲知道其

言不過迨天之未陰雨綢繆牖戶而已他日太子爲徽宗道之徽宗以爲然及靖康中振尹京府言利者頗離閒兩宮振善於調護由是無纖介之疑旣死人皆出涕

後贈端明殿學士

宋史 白志舊案林志振於端平中追諡剛愍

石昉字德輝樂平人宣和進士授龍州司工曹事以靖康元年之官明年金兵入陝官吏失守惟隴守劉化源誓死不去檄昉權倖與昉畫地分守力不支金兵執之勒換授執不可盡室二十三人驅之北去拘留邠州洪皓留北與昉時相聞左右二帝於五國城與劉化源俱以不屈死

人物志

朱嗣孟字道鳴樂平人宣和進士爲廣德司戶南渡初叛卒破鎮江遂犯廣德守倉皇遣使招安無敢當者嗣

孟雅自負不復遜直詣賊壘爲陳逆順禍福使自擇所

處賊以爲忤殺之事聞官其子公慶終開化宰

人物志

程克俊字元顓浮梁人宣和進士調湖州刑曹改太學  
錄召對論事訐直擢翰林學士時大將怙恩邀寵制書  
所及多裁抑之淮瓦梁堰淤廢被命往視盡得故隄順  
昌之捷金使來和當直草誓約金主嘆服鄱陽學宮經  
兵火權貴請於朝以爲墓旨已可其奏克俊封還制書  
遷樞密院權參知政事以疾請祠卒諡章靖著有易通

解諸書

林志

程次山字際雲樂平人宣和閒入太學上書忤當軸安  
置光州靖康元年冬潰軍趙立陷光州次山與吳翊合  
謀復之是冬金人入汴次山隨河東經略傅亮併力勤

王至濟州奉迎高宗受冊移檄僞楚斥其僭義聲甚振  
車駕駐建康次山與魏祐上書忤宰相繫獄帝察其忠  
詔府尹湯東野出之

人物志

向伯奮字元伯樂平人以蔭補官攝開封脫死囚甚眾  
靖康國難伯奮監在京市易務時帑藏充羨金人求索  
旨令押本務物輸之伯奮憤惋止用藥物雜品數輦隨  
以往詞直色厲金人信不疑尋聞僞詔棄官去高宗召  
知建州帥襄陽擒劇賊李彥猷王大漢甚著威聲當路  
薦其才召對陳四事上偉之孝宗嗣位擢戶部侍郎奏  
兵貴精不貴多黜老懦選精銳使人人可用則兵不冗  
財不匱尋得祠劉權王宣竊發廣右起知靜州伯奮威  
名素著至則約日出降後改知筠州復祕閣修撰

人物志

夏頴達德興人甫冠舉於鄉補太學生靖康初金兵至上命李綱與之決戰執政惑和議諷臺諫劾罷之頴達率同舍生陳東劉銓等六十餘人伏闕上書復用綱張浚開闔江淮留幕下浚命其子栻受經術後奏補惠州文學遷鄂州蒲圻縣丞改知吉州龍泉縣歲大饑郡守希轉運使意不聽民訴災民遮頴達馬號泣以請詣府陳之不許因趨出悉取民所訴狀屬吏按行阡陌先蠲其租自詣轉運使得蠲恤屬邑效之移知清流縣數月以憂免

人物志

汪沆字濟遠浮梁人靖康間金兵入關結盟去沆時爲太學生逆知敵必渝盟即聞上書極論求才練兵爲守備計不報明年敵人再至沆以書抵粘罕陳內外大義

用兵利害遂東歸遇李綱又投書有言不足慮實可慮者四綱瞋之竟以國恥未雪憤鬱而卒弟澈自有傳

林志

汪澈字明遠自新安徙居浮梁紹興進士教授衡沅用薦爲祕書正字校書郎除監察御史進殿中侍御史時和戎歲久邊防浸弛澈陳養民養兵自治豫備之說累數千言左相湯思退不協人望澈同陳俊卿劾罷又論鎮江大將劉寶十罪詔奪節予祠尋由御史中丞出爲湖北京西宣諭使時唐鄧陳蔡汝潁相次歸職方未幾金主亮死澈乞出兵淮甸與荆襄軍夾擊其歸師未報而金新主罷兵請和召澈入爲參知政事與宰相陳康伯同贊內禪孝宗卽位銳意恢復首用張浚使江淮澈以參豫督軍荆襄將分道進討緒略就隆興元年入奏

還武昌而張浚剋期大舉詔澈出師應之澈以議不合  
乞令浚併領荆襄諫議大夫王大寶論澈無制勝策除  
資政殿學士提舉洞霄宮大寶疏再上落職仍祠祿明  
年知建康府尋除樞密使在位二年以觀文殿學士知  
鄂州兼安撫使孝宗訪邊事澈奏向者我有唐鄧爲藩  
籬又皇甫倜控扼陳蔡敵不敢窺襄旣失兩郡倜復內  
徙敵迫新野相距百里爾臣令趙撙王宣築城儲糧分  
備要害有以待敵至於機會之來難以豫料孝宗善之  
時議廢江州軍澈言不可知甯國府改福建安撫使復  
請祠致仕卒年六十三贈金紫光祿大夫諡莊敏有文  
集二十卷奏議十二卷

宋史

洪适字景伯皓長子皓使朔方适年甫十三能任家事

以皓出使恩補修職郎紹興十二年與弟遵同中博學  
宏詞科高宗曰父在遠方子能自立此忠義報也遂除  
敕令所刪定官後三年弟遵亦中是選由是三洪文名  
滿天下改祕書省正字甫數月皓歸忤秦檜出知饒州  
适亦出爲台州通判垂滿皓謫英州适後論罷往來嶺  
南省侍者九載檜死皓還道卒服闋起知荆門軍改知  
徽州尋提舉江東路常平茶鹽首言役法不均之弊升  
尚書戶部郎中總領淮東軍馬錢糧孝宗卽位海州解  
圍符離用兵饋餉繁多适究心調度供億無闕遷司農  
少卿隆興二年召貳太常兼權直學士院上欲除諸將  
環衛官詔討論其制适具唐及本朝沿革十一條上之  
除中書舍人時江淮羽檄沓至書詔填委咨訪騰答率



稱上旨自此有大用意金旣尋盟首爲賀生辰使得其要領以歸乾道元年五月遷翰林學士仍兼中書舍人秦埴久廢忽予祠適奏曰李林甫死後諸子皆流配嶺南秦檜檢惡自斃不肖之孫官職仍舊可謂幸矣宮觀雖小埴得之則人以爲除用之漸恐檜黨牽連而進其命遂寢六月簽書樞密院事上諭參政錢端禮虞允文曰三省事與洪适商量東西府始同班奏事八月拜參知政事十二月拜尚書右僕射同中書門下平章事兼樞密使未幾乞歸卒諡文惠

宋史

洪遵字景巖皓仲子以父蔭補承務郎與兄适同賜進士出身高宗以皓遠使擢爲祕書省正字中興以來詞科中選卽入館自遵始皓南還與朝論異出守遵遂乞

外通判常婺越三州復入爲正字八月兼權直學士院  
湯鵬舉副臺端密薦爲御史方賜對而父訃聞免喪召  
對極陳父冤曰先臣與龔璘同出疆璘仕於劉豫以妄  
殺兵官爲豫所誅而秦檜贈以節旄擢用其子先臣拒  
金人之命留十五歲乃得歸顧南竄嶺外臣兄弟屏迹  
在外檜不分忠逆如此高宗悉爲道謗語所起且曰卿  
再登三館當典書命今以修注處卿遂拜起居舍人奏  
乞以經筵官除罷及封章進對宴會錫予講讀問答等  
事萃爲一書名之曰邇英記注其後乾道閒又有祥曦  
殿記注實自遵始遷起居郎兼權樞密院都承旨舊制  
修注官經筵官許留身奏事而近例無有遵奏請復舊  
制且言起居注未修者十五年請除見修月進外每月

帶修皆從之二十九年拜中書舍人時勳臣子孫多躡  
居臺省遵極言侍從朝廷高選非如磨勘階官安有遷  
序之制望收還前詔又言瑞昌興國之閒茶商失業聚  
爲盜賊望揭榜開諭許其自新願充軍者填刺願爲農  
者放還上皆可其奏尋試吏部侍郎遷翰林學士兼吏  
部尚書汪澈論湯思退罷相遵行制無貶詞澈以爲言  
遂勾去以徽猷閣直學士提舉太平興國宮三十一年  
完顏亮命蘇保衡由海道窺二浙朝廷以浙西副總管  
李寶禦之命遵知平江寶以舟師擣膠西凡資糧器械  
舟楫皆遵供億寶成功而歸遵之助爲多先是朝廷慮  
商船爲賊得悉拘入官旣而不返並海縣團萃巨艦及  
募水手民兵皆繫留之未得去遵因對論之以船還商

而聽水手自便吳人德之孝宗卽位拜同知樞密院事連章乞免乾道六年起知信州徙知建康提舉洞霄宮

卒諡文安

宋史

洪邁字景盧皓季子幼讀書日數千言一過目輒不忘從二兄試博學宏詞科邁獨被黜紹興十五年始中第授兩浙轉運司幹辦公事入爲敕令所刪定官皓忤秦檜投閒檜憾未已遂出添差教授福州累遷吏部郎兼禮部除樞密檢詳文字建議令民入粟贖罪以紓國用又請嚴法駕出入之儀吳璘病篤朝論欲徙吳玠代之邁曰吳氏以功握蜀兵三十年毋使尾大不掉知樞密院事葉義問出視師奏以邁參議軍事至鎮江聞瓜州官軍與金人相持會建康走驛告急義問遽欲還邁力

止之曰今退師無益京口勝敗之數而金陵聞反旆人心搖動不可遷左司員外郎三十二年春金遣左監軍高忠建來告登位且議和邁爲館伴使時議遣使報聘邁慨然請行書用敵國禮至燕金閣門見國書呼曰不如式抑令改陪臣二字邁執不可多方困辱卒遣還乾道六年除知贛州郡兵素驕小不如欲則跋扈郡歲遣千人戍九江是歲或怵以至則留不復返眾遂反戈民訛言相驚百姓恟懼邁不爲動但遣一校婉說之歸營徐詰什五長兩人械送潯陽斬於市尋知婺州奏金華田多沙勢不受水五日不雨則旱凡爲公私塘堰及湖總八百三十七所募軍素無律春給衣欲以緡易帛吏不可則羣呼嘯聚以計逮捕四十有八人置之理黨獄

相嗾閔擁選轎邁曰彼罪人也汝等何預眾遂巡散去  
戮首惡二人梟之市餘黥撻有差莫敢譁者特遷敷文  
閣待制召對首論淮東邊備六要以提舉佑神觀兼侍  
講同修國史預修四朝帝紀進敷文閣直學士拜翰林  
學士上四朝史一祖八宗百七十八年爲一書淳熙改  
元進煥章閣學士知紹興府明年再上章告老進龍圖  
閣學士尋以端明殿學士致仕是歲卒年八十贈光祿  
大夫謚文敏有容齋五筆夷堅志行於世其他著述尤  
多

宋史

戴松字桂之弟檜字寬甫父稠婺州人爲饒州刺史因  
占籍鄱陽松中童子科進士官正字檜未仕稠病革謂  
松曰爾幸食祿王家念爾弟幼且貧所有田廬悉以畀

之父歿松以田宅遜弟檜弗受彼此交讓各棲別館事

聞命有司建禮遜坊以旌其義

安志 謝志舊案前志載松寓賢今從安志改

入又安志孝義傳尚有德興朱齡余安行樂平鄭時懋程愈浮梁甯從龍餘干張憲鄱陽葉耕附志姓名於此

江西通志卷一百六十一

列傳二十八 饒州府二

宋

程舟字濟川德興人紹興進士仕桂陽丞所著有雷溪文集與兄侗皆以文學知名教授弟子

朱子全集

董琦字順之德興人年二十五始從韓溪程氏受春秋學義役法行首出田粟里人賴之爲人精悍議論貴決白涉世不偶更折節爲儒生自力於善老年漸屏家務卽所居旁藝花果以自娛以子銖官授迪功郎

朱子全集

李儼甫鄱陽人母疾籲天刲股疾亟刲肝以進母疾頓蘇異香滿室紹興閒表之曰孝子李儼甫之門

林志

王剛中字時亨樂平人紹興十五年進士第二人由推



官改左宣義郎故事當召試秦檜怒其不詣已授洪州  
教授檜死召見樞祕書省校書郎遷著作佐郎中書舍  
人言今日禦敵先務敵強則犯邊弱則請盟今弗計敵  
人之強弱必先自治擇將帥蒐戰士實邊儲備器械國  
勢富強將良士勇請盟則爲漢文帝犯邊則爲唐太宗  
上韙其言會西蜀謀帥上曰無以逾王剛中矣以龍圖  
閣待制知成都府制置四川時吳璘累官至大帥其下  
姚仲王彥等亦建節雄一方惟剛中檢身以法示人以  
禮不立崖塹取吏恩威並行羽檄紛沓從容裁決皆中  
機會敵騎度大散關人情洶洶剛中跨一馬夜馳二百  
里起吳璘於帳中責之曰大將與國義關休戚臨敵安  
得高枕而臥璘大驚又以一蠟丸書抵張正彥西師大

集金兵敗走方議奏捷剛中倍道馳還謂其屬李燾曰  
將帥之功吾何有焉燾嘆曰身督戰而功成不居過人  
遠矣已乃差擇將士眾所推者上之朝備統帥選孝宗  
受禪以宮僚進左朝奉大夫召赴闕以足疾請祠提舉  
太平興國宮歸次番陽營圃植竹號竹陽金犯淮有旨  
趣剛中入見陳戰守之策除禮部尚書簽書樞密院進  
同知院事剛中曰戰守者實事和議者虛名不可恃虛  
名害實事又奏四事開屯田省浮費選將帥汰冗兵居  
政府屬疾卒年六十三贈光祿大夫諡恭簡繇布衣至  
公卿無它嗜好公退惟讀書著文爲樂有易說春秋通  
議仙源聖紀經史辨漢唐史要覽天人修應錄東漢集

應齋筆錄凡百餘卷

宋史

羅鞏字伯固樂平人與王剛中少以文相雄同登進士  
宰安福庭無淹訟強宗鉅室帖就繩墨用薦除宗正丞  
尋遷監察御史奏對剴切上謂左右曰朕得羅鞏居六  
察真御史也遷大理少卿明決果斷案下無冤民以疾  
畀祠

人物志

計衡字致平浮梁人紹興進士官徽州教授檢法監察  
御史轉朝奉大夫得祠衡博洽強毅遊太學時上書言  
天下大計者四留介使以款敵國之謀下詔書以感河  
北之士先舉事以決進取之策用人望以激忠義之氣  
及入官每著善政死之日家無餘貲吳澄嘗稱爲清白

吏

林志

洪綸字德言樂平人擢第初尉咸甯尋令萬載察橫民

爲民害者薙獮之境內以肅乾道閒歲大歉綸不復白  
長直發廩賑貸之部使者不以爲罪更薦之朝命未下  
以憂去

人物志

趙善應字彥遠餘干人丞相汝愚之父官終修武郎江  
西兵馬都監性純孝嘗刺血和藥以進母畏雷每聞雷  
則披衣走其所母喪哭泣毀瘠終日俯首柩旁聞雷猶  
起側立垂涕父終肺疾每膳不忍以肺爲羞母生歲值  
卯謂卯兔神也終其身不食兔聞四方水旱輒憂形於  
色江淮警報至同僚會宴善應悵然曰此甯樂飲時邪  
眾爲失色而罷夏不火草冬不破壞懼百蟲之遊螫者  
失其所也晉陵尤袤稱之曰古君子旣卒丞相陳俊卿  
題其墓碣曰宋篤行君子趙公彥遠之墓

朱子集  
墓志

余童字端蒙樂平人紹興進士爲吉水令擢知信陽軍  
因圖信陽山川以獻且奏三關爲荆楚之蔽信陽又三  
關之蔽失信陽則三關不足恃當使三關信陽相爲犄  
角上覽圖甚善擢知蘄州行歉歲荒政等戶爲三甚貧  
者與賑濟無益藏者與賑糶有田可服饑不能耕者與  
賑貸民不知爲凶年除江西提舉卒平生嗜書乃擬元  
準虛爲極書

人物志

余時言字知默上饒人徙居浮梁紹興進士授安豐軍  
教授歷仕內外臺府有能聲贊上親征隆興初知漢州  
值蜀大歉所部獨登出粟活流民二十餘萬終敷文閣

待制

林志

鍾炤之字彥昭樂平人紹興進士尉善化令宿松教宜

陽士民愛敬仕潭日受教張栻爲書淇澳一章期以學

問工到則人理明而本心立炤之服膺終身

人物志

朱伯雄字少陽浮梁人紹興進士歷桂陽教授吉水知縣潛心六經集漢唐以下諸儒羽翼六經之說各以類從附以已見學者翕然宗之以董仲舒春秋繁露義有未當別著繁露十卷

人物志

趙汝愚字子直漢王元佐七世孫居饒之餘干擢進士第一簽書甯國軍節度判官召試館職遷校書郎祕書少監兼權給事中言內侍陳元不宜使居總戎之任駁張說託言邊機不宜泄改密院文書經門下省舊制以集英殿修撰帥福建進制置四川兼知成都府諸羌蠻相挺爲邊患汝愚至悉以計分其勢孝宗謂其有文武

威風紹熙

謝志誤興

二年召爲吏部尚書上常以五日一朝

孝宗於重華宮至是往往以傳旨免汝愚往復規諫上意乃悟又屬嗣秀王伯圭調護於是兩宮之情始通除知樞密院事五年春孝宗崩上日昃不出宰相率百官詣重華宮發喪留正汝愚議介少傅吳玠請憲聖太后垂簾暫主喪事憲聖不許汝愚以國本係乎嘉王乃入奏云皇子嘉王仁孝夙成宜早正儲位以安人心不報越六日再請御批付丞相云厯事歲久念欲退閒留正見之懼因朝臨伴仆於庭密爲去計汝愚自度不能辭其責與徐誼葉適謀可以白意於慈福宮者乃遣韓侂胄以內禪之意請於憲聖遇重華宮提舉關禮告之故因轉陳憲聖侂胄復命汝愚始以其事語陳睽余端翌

日禪祭羣臣入憲聖垂簾汝愚率同列再拜奏皇帝疾  
未能執喪臣等乞立皇子嘉王爲太子以繫人心皇帝  
批出取太皇太后處分憲聖乃命皇子卽位甯宗詣几  
筵殿哭盡哀衰服出就重華殿東廡素幄立內侍扶掖  
乃坐百官起居訖行禪祭汝愚特進右丞相力辭至再  
三不許而侂冑自以有定策功且依託肺腑出入宮掖  
居中用事朱熹進對以爲言內批除熹宮觀吏部侍郎  
彭龜年力陳侂冑竊威福又奏近日逐朱熹太暴故欲  
陛下亦亟去此小人旣而內批龜年與郡侂冑勢益張  
日夜謀擯汝愚視正士如仇讎正言李沐奏汝愚同姓  
將不利社稷乞罷其政遂罷相知福州國子祭酒李祥  
博士楊簡太府丞呂祖謙皆上書訴汝愚之忠大學士



楊宏中等伏闕上疏悉得罪安置羈管去侂冑忌汝愚益深謂不重貶人言不已責甯遠軍節度副使永州安置爲守臣錢鞏所窘暴薨天下聞而冤之侂冑誅盡復原官賜諡忠定所著詩文十五卷太祖實錄舉要宋朝諸臣奏議三百卷

宋史

姜夔字堯章鄱陽人先世出九真唐中書門下侍郎公輔之裔八世祖泮官饒州教授父噩紹興進士以新喻丞知漢陽縣夔從父宦游流落古沔冲澹寡欲不樂時趨氣貌若不勝衣工書法著續書譜以繼孫過庭頗造翰墨間域詩律高秀琢句精工詞亦清虛騷雅如野雲孤飛去留無迹尤嫻音律初從蕭剡學詩剡攜之茗上妻以兄子一時張翥楊萬里輩皆折節與交而樓鑰范

成大更相友善紹興中秦檜當國去隱武康縣箬坑之  
丁山累薦不起高宗賜宸翰夔建御書閣以貯焉嘗患  
樂典久墜欲正容臺樂律甯宗慶元三年詣京師上大  
樂議一卷琴瑟考古圖一卷詔付有司收掌特予免解  
時有嫉其能者以議不合而罷五年作饒歌鼓吹曲一  
十四章上於尚書省書奏詔付太常周密以爲言辭峻  
絜意度高遠有超越驂騑之意非虛譽也居與白石洞  
天爲鄰因號白石道人時往來西湖館水磨方氏後以  
疾卒葬西馬塍子二瓊太廟齋郎瑛禾郡僉判嚴杰南  
宋姜夔  
傳謹案夔與西秦張炎齊名爲南宋詞家正軌猶唐  
詩人之有李杜徒以移家湖州而宋史又失載夔傳故  
舊志及饒州府縣志皆寥寥數言未能詳盡茲據國  
朝阮元所輯詩經精舍文集損益他書改訂斯傳備是  
邦文獻之徵云

洪友成字士源樂平人宰興國邑旱以蠲賦八分請守  
拒不聽友成納印徑去守慙貽書勉留入爲審計司遷  
大理寺丞因奏對援師說俾縣令與丞尉同訊獄梁成  
大詆爲迂闊友成不爲屈尋以親老乞郡得衡改瑞簡  
易爲政州人便之

人物志

馬元益字孝昭樂平人少負韜略紹興末柄臣諱言兵  
張浚言和不足恃竄永州元益方督造戎器上書乞乘  
敵未動先發制之犬忤時相送桂陽編管已而敵謀果  
洩上追省前言大修戰備竟成辛巳之捷任至閣門宣

贊

人物志

程宏圖字士尚浮梁人工詞翰負氣節紹興講和以來  
金使道經凡官私門額悉覆之以楮金使往天竺過太

學門臨安尹命吏如例幕太學二字時宏圖直學欄幘立其下正色曰賢士之關國家儲才地何歉於遠人拒之不聽幕使白尹上聞孝宗在東宮嘉嘆之後卽位宏圖登第喜曰朕聞其名久矣他日有用之佐也擢大理司直遷丞卒

人物志

謹案原稱隆興開金使往天竺又云孝宗在東宮誤也隆興卽孝宗年號

刪今

趙汝靚汝愚從弟餘千人潛心理學苦節不渝嘗作山東書院留朱子講學後人祀朱子於書院靚亦從祀人志

趙崇憲字履常汝愚長子淳熙八年對策第一越三年復以進士擢甲科汝愚旣貶死崇憲闔門自處居數年復汝愚故官職多勸以仕改奉議郎知南昌縣事升籍

田令崇憲拜命感泣陳疏力辭以爲先臣之冤未悉昭  
白而其孤先被寵光非公朝所以勸忠孝厲廉恥之意  
俄改監行在都進奏院復引陳瓘論司馬光呂公著復  
官事申言之乞以所陳下三省集議使先臣之讒謗旣  
辨忠節自明而憲聖慈烈皇后擁護之功德益顯然後  
申飭史官改正誣史又請正趙師召妄貢封章之罪究  
蔡連與大臣爲讎之姦燬龔頤正續稽古錄之妄從之  
詔兩省史官考訂以聞未幾贈汝愚太師封沂國公擢  
崇憲軍器監丞改太府監丞遷祕書著作權考功郎請  
外知江州郡民歲苦和糴崇憲疏於朝永蠲之瑞昌民  
負茶引錢新舊累積困不能償死則以責其子孫猶弗  
貸會新券行視舊價幾倍徒崇憲亟請以新券一償舊

券二受賜者千餘家遷轉運判官以兵部郎中召尋改

司封皆固辭出知靜江府

宋史

許錫字晉之樂平人淳熙進士令建昌守興國用眞德秀薦除夔路運判部內諸郡不產鐵而官責鼓鑄奪民鍤鋤以充錫奏罷之尤留意鹽筴一洗宿弊經用外所餘常例皆貯公帑視前頓倍分十萬爲下戶輸賦而盡籍其數以聞久之除刑部郎中投劄廟堂以語取忤乞祠除知漳州不赴請老歸

人物志

董煇字季興德興人受學沙隨程氏紹熙進士知瑞安改辰溪值歲饑行救荒策民賴以蘇甯宗廢之召見進所撰救荒活民書敕曰爾忠報國誠在愛民自號南隱

有南隱集

林志

柴中行字與之餘干人紹熙進士授撫州軍事推官韓  
侂冑禁道學校文轉運司移檄令自言非僞學中行奮  
筆曰自幼讀程頤書以收科第如以爲僞不願考校調  
江州學教授母喪免廣西轉運司辟爲幹官嘉定初差  
主管尚書吏部架閣文字遷太學正升博士轉對首論  
主威奪而國勢輕次論士大夫寡廉隅乏骨鯁宜養天  
下剛毅果敢之氣末論權臣用事包苴成風今舊習猶  
在宜舉行先朝痛繩賊吏之法遷太常主簿出知光州  
嚴保伍精閱習增闢屯田城濠營砦器械糗糧治行爲  
淮右最遷西京轉運使兼提點刑獄改知襄陽兼京西  
帥仍領漕事江陵戎司移屯襄州兵政久弛中行白於  
朝考覈軍實舊額二萬二千人存者纔半亟招補虛籍

自是朝廷以節制之權歸帥司由是入爲吏部郎官擢  
宗正少卿進祕閣修撰知贛州治盜有方境內清肅勾  
祠得請以言罷理宗卽位以右文殿修撰主管南京鴻  
慶宮卒所著有易繫集傳書集傳詩講義論語童蒙說

宋史 白志舊案人物志  
中行謚獻肅史傳失載

張宏字子廣鄱陽人性鯁直沖淡從柴益之學明經飭  
行及禁伊洛之學歎曰吾道窮矣乃歸隱少與柴中行  
友中行以提刑出守訪宏拒其騶從不納中行退攜一  
童往謁淹住劇談君子謂宏之高古中行之悔過均足

尚云

林志

程端蒙字正思德興人朱子門人自名其齋曰求放心  
朱子爲之銘淳熙七年領鄉貢補太學生時禁洛學持



書上諫議大夫王自然責其疏斥正學及對蘇程王氏策問主司意在陰詆朱子正思奮筆曰王氏以佛老之學蠹壞人心蘇氏有立朝大節不以變故死生動心此其天資超卓有非常人所可及者恨其學術未醇未免有戰國策士餘習繼孔孟之傳排異端闢邪說道統所傳不歸之二程又其誰哉自知所對不合時好投筆竟去自是遂不復應舉所著有性理字訓毓蒙明訓學則等書既卒朱子爲墓表又稱其弟端臨端本子實之亦知爲學云

人物志

白志舊案朱子程正思墓表以爲

容退然若不勝衣而自勝有以舉烏獲之任其言若不出諸口而衛道足以摧髡衍之鋒擗許如此其學行可

知矣

曹建字立之餘干人幼穎悟厲學一日得河南程氏書

讀之慨然盡棄其所爲者而覃思於諸經聞張敬夫講  
道湖湘欲見之不能至有告以沙隨程氏學古行高者  
卽往從之旣又聞陸氏兄弟獨以心之所得者爲學則  
又往受其學晚年登朱子之門論易之大畜何天之衢  
建曰何其天之通達也朱子大器之故易傳本其義建  
家居事母孝待弟姪友愛死之日正冠危坐語其弟廷  
曰吾雖病甚而學益進此心瑩潔無復纖翳語訖而歿  
人物志 白志舊案朱子集中曹立之墓表稱其學博而不雜約而不陋斯道之傳其庶幾乎史傳不在朱子門人之列特表出之

劉泌字伯正餘干人嘉泰進士厯官郡縣臺省院部以

母老乞養嘗爲母祈壽甘露三降庭梅

林志

劉伯正字直卿餘干人開禧進士積官監察御史有事

於明堂雷電忽至執事者鮮不離次伯正立殿下紳笏儼然帝遂以大任期之拜參知政事卒贈少保時論謂其立朝以靜重鎮浮不求名譽云

林志

鄒孟卿字醇甫餘干人開禧進士知豐城會興元軍士張福莫簡亂殺制置聶子述總領楊尤鼎陷閬州果州廷議孟卿有文武材授行軍參議與賊戰敗之簡自殺福請降升四川制置兼茶馬使敵不敢犯邊後被譖賜死事白詔復其官諡忠襄

林志

洪邦直字應賢樂平人登第授婺源縣尉秩滿升知縣事時饑大舉荒政民賴以活當路交薦特旨賜對除御史在婺源嘗以猛得怨既入察舊隸有誣之朝者上雅知邦直流誣者嶺表邦直懷不自安因匄去上察其廉

貧進官兩秩賜白金縣令增秩賜金自邦直始

人物志

趙必愿字立夫崇憲子以大父汝愚蔭調常熟丞嘉定七年舉進士歷知處泉台婺四州遷太府寺丞度支郎中改宗正少卿進太府卿權吏部右侍郎時邊事亟必愿請敕彭大雅以復夔賁歸峽二守以自效伐順流之謀折擣虛之鋒備江陵之境守沅江益陽江以防衝突盡收江上民船無資敵用區畫皆中事機改戶部尚書因忤丞相史嵩之屢乞祠不許卒

人物志

甯時鳳字祥夫浮梁人登第官蘄州嘉定辛巳金兵圍蘄守李誠之云誰能共守諸僚佐不應獨時鳳曰見危授命臣子大節臨難而免吾不忍爲卒死之

林志

張文之字子經樂平人通判濠州金兵至守孔福謀夜

逸文之曰果爾輕動奈一城何自提兵出登橫澗山與敵相持十餘日經二十餘戰無外援力不能支被執送燕山欲授以官義不屈囚之土窟曰吾世受宋恩其忍負國金人重之後王抃來議和見文之苦狀爲請於金帥得一家書附抃還奏

林志

金從龍字誠之浮梁人嘉定進士知涪州樂溫時金兵犯蜀潰將王全者擁兵入境從龍任供餉留戍守邑賴以全魏了翁西歸見樂溫歸然獨存大加稱賞改知瀘州納溪兼通判未幾寇大至力不能支竟死事聞賜贈

蔭

林志

王趙字國瑞樂平人嘉定進士授光州固始簿有經略善撫綏明年金人圍光州趙解之改固始令厲兵完城

紹定四年金兵犯淮守令望風遁趙舉輕騎襲金營出其不意得輜重以還金怒奮兵圍固始城濠深浚敵不能入相守三月無援趙度勢不可支乃屬固始民曰我不忍若等流離顧事勢不可爲遂懷印赴漆井死諡勇

節

人物志

史寅仲餘干人嘉定閒以詩經登第仕至朝散郎知化

州洞蠻負固督軍出捕沒於陣贈朝散大夫蔭其子

林志

鍾宏字子虛樂平人從邑宰楊簡游見器重嘉定進士

主建德簿再任貴溪丞著惠政同門袁甫表諸朝稱其

學有淵源實得故閣學楊簡之傳由兩浙漕屬入爲太

學錄供職甫一月謁告省親累擢皆不起

人物志

余大昕字仲昭德興人性至孝以詩名程迥稱其閒淡

古雅不下邵康節晚年以孝廉舉任潭州知錄著有宜

安集

林志

史本鄱陽人性至孝父沒廬墓悲號有芝草之瑞舉進士試易經甯宗閱卷以爲江南真秀才歷任至奉直大夫居官廉潔時稱孝廉

林志

李遇龍字叔興浮梁人紹定進士歷官樞密都承旨刑部侍郎集英殿修撰諡忠定改忠靖遇龍重厚深沈恆以國事爲憂立朝規箴言必剴切在外輕徭薄征以紓民力繕城謹燧以固邊防募民粟廣屯種以足軍餉興學校精簡拔以起士類且矢死報國克復全蜀捷上聞有一念精誠堅忠定力之褒

林志

彭大雅字子文鄱陽人進士官朝請郎出爲四川制置

副使甚有威名嘉熙四年使北涪祐三年守重慶時蜀地殘破大雅披荆棘冒矢石築重慶城以禦利閭蔽夔峽爲蜀根柢人德之爲立廟卒諡忠烈孫克紹博學能詩有學餘藁

豫章書

白志舊案彭大雅集中有致仕得請七律二章非卒官重慶者又按大雅

於嘉熙涪祐中已入官矣鄒陽縣志以爲寶祐進士者說

李伯玉字純甫餘干人端平二年進士第二授觀察推官召試館職歷詆貴戚大臣直聲暴起改校書郎奏言臺評迎合上意論罷尤焞楊棟盧鉞三人忠衷不辨乞同罷帝不允差知南康軍遷著作佐郎兼考功右司員外郎引故事彈臺臣蕭泰來遷著作郎帝怒降兩官罷敘復知邵武軍改湖北提點刑獄移福建度宗卽位兼侍講權禮部侍郎兼同修國史實錄院同修撰賈似道



嘗集百官議事忽厲聲曰諸君非似道拔擢安得至此  
眾默然莫敢應者伯玉答曰伯玉殿試第二名平章不  
拔擢伯玉地步亦可以至此似道雖改容而有怒色既  
退卽治歸以顯文閣待制知龍興府右正言黃萬石論  
罷召入覲擢權禮部尚書兼侍讀似道益專國柄帝以  
伯玉舊學進之臥內相對泣下欲用以參大政似道益  
忌之尋病卒伯玉嘗請罷童子科以爲非所以成人材  
厚風俗趙汝騰嘗薦八士各有品目於伯玉曰銅山鐵  
壁立朝風節大較似之所著有斛峯集

宋史

馬廷鸞字翔仲樂平人淳祐進士調池州教授召試館  
職時外戚謝堂厲文翁內侍盧允升董宋臣用事廷鸞  
試策言彊君德重相權收直臣防近習大與時忤遷祕

書省正字四年尤煇提舉史事辟爲史館校勘遷校書  
郎兼權樞密院編修官時賈似道自江上還位望赫奕  
廷鸞未嘗親之遷樞密院編修官擢起居舍人進中書  
舍人遷禮部侍郎理宗遺詔度宗登極詔皆廷鸞所草  
兼侍讀辭不許疏列孝宗之政以告升直學士院咸淳  
元年進端明殿學士簽書樞密院事兼權參知政事同  
知樞密院事進右丞相及辭位帝惻怛久之曰丞相勉  
爲朕留廷鸞言臣死亡無日恐不得再見君父然國事  
方殷疆圉孔棘天下安危人主不知國家利害羣臣不  
知軍前勝負列闕不知陛下與元老大臣惟懷永圖臣  
死且瞑目頓首涕泣而退自罷相歸又十七年而薨

朱貔孫字興甫浮梁人清祐進士丁大全在臺勢燄薰

灼天久陰雨。獬孫貽書政府言回積陰之道去姦邪。罷手實蠲米稅姦邪指大全也。丞相董槐得書嘉歎。主管尚書工部架閣文字官者董宋臣寵幸用事。獬孫發策試胄子。極論宦寺專權之患。宋臣諷言者論之。謁告歸省。遷太學博士。屬帝親擢監察御史兼崇政殿說書。在講筵言及宋臣撓政事忤旨。遷大理少卿。又遷司農少卿兼太子右諭德。詔許乘馬赴講。獬孫論導得體。太子每爲之改容。兼國史院編修官實錄院檢討官兼權直舍人院時。大禮成封命叢委吏持詞頭下。每夕無慮數十。獬孫運筆如飛。夜未中已就。皆溫潤典雅。遷宗正少卿。丁母憂服除。授祕書監兼太子左諭德。擢殿中侍御史。所論皆當世急務。宋臣覆出朝論紛然。獬孫因對力

斥其姦長星出東方貌孫力議外戚內臣及進奉羨餘  
失人心者且曰回天心自回人心始辭旨懇切帝爲之  
感動度宗卽位擢右諫議大夫以疾乞辭言職遷吏部  
尚書不拜帝以舊學故雅欲留貌孫使者旁午於道而  
貌孫辭益力以華文閣學士知甯國府似道諷言者論  
罷久之提舉太平興國宮復華文閣學士知袁州移福  
建安撫使未行卒於袁之郡治有文集奏議行世宋史  
董銖字叔仲德興人登進士授金華尉游朱子之門凡  
來學者朱子必命銖與辨難然後折衷所著有性理注

解易注卒黃勉齋志其墓

林志謹案董銖安志作董  
珠又云學者稱珠盤淵先生

同邑先後有王過董夢臣董鼎沈貴瑤董琮過字幼觀  
深明性理之學夢臣字萬里開禧進士官至朝散郎欽  
州通判鼎字季亨貴瑤字誠叔琮字玉振慶  
元閒進士任龍陽簿邇其學源皆本於朱子

鍾季玉樂平人淳祐進士調爲都大坑冶屬改知萬載縣淮東制置使李庭芝薦之遷審計院改宗正寺簿又遷樞密院編修出知建昌軍會有旨江西和糴季玉至郡才半年屬歲旱請於朝和糴得減三之一遷提舉常平未幾改江西轉運判官郡大胥以賄敗前使百計譖之季玉卒窮治投嶺表俄以祕書丞召還遭前使構讒而封駁之改都大提點坑冶北兵渡江季玉徙寓建陽兵至不屈死之

宋史

余季芳字子初德興人少孤與兄木力學事母淳祐丁未及第言於銓曹曰受訓慈幃願明家學微榮干祿實匪初心旣竊收名志求歸養銓曹以聞敕報曰謝名乞養臣子良心欲勵孝廉宜從所願特賜同進士出身授

九江府司法有桃谷書義桃谷詩稿

府志

陳學心安仁人淳祐進士官至高州知府謝枋得起兵復安仁命學心守之元兵至戰死

人物志

朱宏字元禮浮梁人幼厭程式之習精研義理身體力行朱子嘗稱之曰高識篤行鮮與倫比爲銘其堂曰克己作回瀾集以斥佛氏述古冠婚喪祭之儀名曰禮編

人物志

金去僞字敬直浮梁人一舉於鄉卽棄而從朱子遊潛心體驗學者稱曰草窗先生或勸之著書曰經經也史緯也諸儒之訓釋晦庵折衷之集其大成矣卒不著書授鍾離主簿不就

人物志

董爲良字景房德興人少學徐誠叟之門以文行聞於

州再試禮部不第退而講學不復以榮達爲事嘗作活

國書一編識者韙之

朱子集

張顯字立道德興人與董銖程端蒙爲友迺程朱之學  
登進士授武義尉酒醋監理宗詔舉孝廉建康留守馬  
光祖以顯應特遷史館進三朝實錄穆陵玉牒經武要  
略等書

林志

程珙字仲璧德興人師事朱子親授玉山講義所著有  
易說及九疇策疏

人物志

程洵字以正號竹洞德興人端蒙孫與父實之同經互  
占魁亞登洵祐進士求近地以便養主徽州婺源簿去  
家纔三十里攝縣事廉勤和易仕終泉司檢察歸老於  
鄉所著有澹津記問龜峯稿竹洞稿

府志

謹案程洵  
宋人舊志誤列元

代

舒大邦字伯興德興人寶祐進士時賈似道專政凡除授必以賂大邦恥之不願仕又禁於制不得歸後遇東宮赦始獲歸省遂集族黨子弟訓之館於鄭師樓適同年劉子秀過訪語以敵兵下諸郡邑江南危在旦夕大邦遂奮激舉義不逾月而遠近響應得數千人卽部勒詣御前都統程大元部下期年滅南寇屢遷朝官光祿唱名賜宴上聞唱名舒大邦卽召御座前謂曰朕萬幾賴卿等苟安大邦何以輸爲卽御筆於鴻臚劄上更名

文英

人物志

江介字邦直德興人少穎悟習制科業一日因讀程子書至水清性善之說恍若有悟乃喟然太息曰吾生平



所學不過爲利祿計耳是奚足爲遂棄舊學走衢州謁徐誠叟講業其門居數年方歸登進士授興國司戶參軍郡以廉吏薦調隆興府進賢令將行會天旱饑極陳救弊之策民賴全活旣而旁邑官吏多以救饑受賞或喻介盍自言介曰子饑而母乳之爲賞乎會詔蠲民田租之半介白部使者自全戶三升以下悉蠲之貧民被實惠又籍逃田收其租爲繫囚飲食醫藥之費轉四川總領司主管時東川大饑介請得庫之羨錢往賑之民爭繪像立祠秩滿調恭州通判介自奉省約而周瞻族姻甚厚文不務雕刻詞氣卓犖曲盡事理

朱子集

鄒近仁字季友樂平人爲龍陽丞嘗叩道於楊簡一再語而頓覺性至孝或干以利介焉弗受人告之過斂社

以服所當爲雖強禦不畏著有歸軒集

林志

鄒夢遇字元祥樂平人以詞賦薦於鄉爲人孝弟喜愠不形處事一於義從邑宰楊簡遊簡謂自孔子沒學者陷溺於文辭議論喪本靈而事意見寥寥千載自知自信者少若夢遇者庶幾同邑有舒益字裕父洪簡字子裴以蔭補官知茶陵縣曹正字性之官永明尉學有自得寂靜弗忘酬應非擾方溥字成太誠確正直吳埴字仲和馬樸字季文以經學薦授廣昌主簿子燮字敬叔猶子應之字定脩王奇一作琦字表文以文薦補學官余元發字永之以詞賦薦王晉老字子康以蔭入仕篤志於道皆簡門人

林志

洪芹适之曾孫以大父澤入官甫更調登進士第爲欽

州教授部使者先後薦之入遷太學博士擢國博出通判南劍累遷將作少監權直祕書升直學士院中書舍人屬兵興帝悟柄任非人自貽國禍詔書所至聞者奮激蓋芹所草也丁大全罷相出典鄉郡芹繳奏大全鬼蜮之資穿窬之行乞從諫臣所請追官遠竄以伸國法慷慨敢言天下義之帝方銳意向用而以論去退寓永嘉怕然自適卒有文集

宋史

李致遠字彥煥樂平人用薦補授瀏陽司征七更部授三典臬事推見情實吏不得欺時同邑有向友況宰歙邑邑有夜斃人於道而凶弗獲里胥懼失捕遽指某氏曰是嘗停死者顧置不問乎有司聽其言將以子證父定其罪友況喑曰父殺之子證之人情大不美且子方

在幼安能勝箠楚哉歟守亦疑其枉委友況覆出之踰  
年一惡少以斂攘敗及就鞠乃前日脫網之凶也一郡

駭服

人物志

湯漢字伯紀安仁人眞德秀在潭致漢爲賓客江東提  
刑趙汝談薦漢於朝詔免解差充象山書院山長瀄祐  
十二年充史館校書改國史寶錄院校勘會大水上封  
事曰君心敬肆之分實上天喜怒之由一念之敬止帝  
臨汝祥風慶雲所從出也一念之肆上帝震怒妖祲陰  
診所從生也火災應詔復上封事言陛下之所以未能  
任大守重而至於召怨宿禍者始於立心之未公成於  
持心之不敬私心爲主而肆以行之此所以感動天地  
而水火之災捷出於數月之內也陛下得不亟爲治亂

持危之計而可復以常日玩易之心處之乎授太學博士召試館職遷祕書省校書郎升祕書郎提舉福建常平召爲禮部郎官歷知隆興府入爲玉牒所檢討官遷太府少卿改祕書少監度宗卽位授太常少卿遷起居郎兼權中書舍人權兵部侍郎久之以端明殿學士致仕卒年七十一特贈正奉大夫諡文清有文集六十卷

宋史

董鼎字季亨德興人受業於黃幹得其端緒著書傳纂

疏同邑余芑舒亦潛心程朱之學著有書傳解

明一統志

饒魯字伯輿餘干人從黃幹學幹問論語首篇時習是如何用功魯曰當兼二義繹之思慮熟之踐履幹大器之嘗以易赴棘試不遇遂歸專意聖賢之學以致知力

行爲本中書舍人趙汝騰御史董槐左司諫湯中提刑  
蔡抗等皆相爲引薦召不起時理學大明師儒攸屬四  
方聘講無虛日作朋來館以居學者又作石洞書院前  
有兩峯因號雙峯門人私謚曰文元

人物志

吳廷字仲迂淳梁人天資絕人力探理窟一舉於鄉不  
合不復屑意於詞章訓詁饒魯稱其立志堅確踐履篤  
實學者宗之號曰可堂先生後避兵隱橫塘山猶講道  
不廢使者表所居巷曰逸民所著有四書語錄五經發  
明先儒法言粹言重定綱目諸書

人物志

齊興隆字昕翁德興人景定進士官蒲圻令值元兵下  
江南興隆義不食粟佩印綬以歸曰全吾印以還吾君  
全吾身以還吾親遂溺死

人物志

胡允字玉叟樂平人景定五年鄉薦已而棄進士業專務義理之學所著有潛齋文集十卷

人物志

詹載采字可厚樂平人咸淳進士授無爲軍僉判北騎出沒踪淮兵連禍結取需日酷民不聊生載采告守發義庾賑之尋命兼屯田司事役軍民疏湮壅塞築隄扞江疏斗門以走潦水又募民鑿陂塘以備旱淮人耕且安堵始教民士以學從令者免其賦役之半逃而復者賦役俱免政譽大著載采素友厚丞相葉夢鼎時與賈似道不合去國慮黨禍連及遂引年歸

人物志

陳牽字肇方安仁人父詩川以武功補沭陽令咸淳元年父子同舉進士調滁州司戶參軍父喪免改荆閭糧料院又以母憂去調朐山主簿德祐元年繇海道歸杭

授南安軍教授不就。卒少與謝枋得遊，會枋得起兵，安仁首拔入幕，執安仁令李景景。卒里人也。景請得以家貲二萬贖罪。卒曰：「普天之下，莫非王土。家財獨非朝廷錢邪？」聲其罪，斬之。景子率鄉民五千報怨，卒度勢不敵，引兵趨信州，就攝郡事。益王卽位，卒入覲，遷宗正寺簿。太府寺丞領江東安撫使，出上饒，接應郡縣所部才千餘人，屯火燒山。越數月，戰潰，被執至豫章。元帥憐其才，羈縻館留之。遁去後三年，復起兵，尋敗入積煙山中，自刎死。所著有鶴心集。弟年同時被執死焉。

宋史

趙良淳字景程，丞相汝愚曾孫。累世以學行名。號賢宗子。良淳少學於其鄉先生饒魯，知立身大節。及仕，所至以幹治稱，而未嘗干人薦舉。爲冗官二十餘年，考舉及



格改知分甯縣秩滿特差權江西安撫司機宜文字詔  
除諸司審計院督餉江西咸淳末廷臣議眾建宗室於  
內郡以爲屏翰遂以良淳知安吉州尋以徐道隆爲浙  
西提刑以輔良淳已而范文虎遣使持書招降良淳焚  
書斬其使元兵迫獨松關有旨趣道隆入衛道隆旣去  
元兵至軍其東西門良淳率眾城守夜就茭舍陣上不  
歸先是朝廷遣將吳國定援宜興宜興已危不敢往乃  
如安吉見良淳良淳見國定慷慨大言意其可用也請  
於朝留戍安吉已而國定開南門納外兵兵入城呼曰  
眾散元帥不殺汝於是眾號泣散去良淳歸府命家人  
出避乃閉閣自經有兵士解救之復蘇眾羅拜泣曰侍  
郎何自苦逃之猶可求生良淳叱曰我豈逃生者邪眾

猶環守不去良渚大呼曰爾輩欲爲亂邪眾涕泣出復

投繯而死

宋史

周垕字良載鄱陽人咸淳進士署江東提刑幹辦時江淮屢警垕繕城堡儲峙爲杆禦計德祐乙亥元兵圍饒垕奉母入保郡城母卒旣殯而城危丞相江萬里守臣唐震死之元將論眾能以城降者除郡守眾推垕署降表垕泣辭夜遁南土平當路交薦起南劍治中同知廣州總管皆不拜結廬母墓下杜門隱居削迹城市後以孫伯琦貴累封番陽郡侯垕明經博學儻尚氣節世以魯仲連擬之稱曰梅山先生

豫章書

程時登字登庸樂平人自少慕義理之學聞董銖得朱子之傳而鄉鄰程古山學於董盤澗者因往師之搜探

幽微會博於約咸淳甲戌寇擾中原朝廷不廢科舉舊制合江東九路士試之時登衷然首舉明年登太學又明年而宋鼎移矣歸杜門謝游客四方請益之士嘗輻輳盈席一時名流多出其門元訪遺才每物色之輒謝去

人物志

吳中字中行樂平人早慕伊洛之學聞雙峯饒魯得朱子正緒從之遊體認精詳隱而不仕名籍籍當世部使者稅駕其門因質曰論語言心凡幾等中應聲曰簡在帝心天地之心也從心所欲不踰矩聖人之心也其心三月不違仁亞聖大賢之心也飽食終日無所用心眾人之心也使者愕然歎服

人物志

夏椅字景實德興人補太學生會朝廷起復史嵩之率

同舍生上書爭之不報登進士授安慶教授選知鉛山  
書視民如傷四字於座右歲饑救荒有奇政旣解去謝  
枋得作清廉引以紀其績遷安慶通判元兵至郡守范  
文虎降椅恩勢不能支遂飲藥死

林志

章如旦字希周餘干人咸淳進士起家東陽主簿至撫  
州簽判元兵圍襄陽得江萬里書言呂文煥降泣不食  
三日與安仁陳陽見提刑謝枋得會枋得與張練帥議  
勤王帥大喜因與至弋陽入朱神廟卜如旦曰今國家  
大勢如此又何疑哉爲臣子盡忠孝而已枋得顧陽曰  
壯哉章希周也德祐中元兵圍饒州枋得集兵安仁如  
旦起兵迎之旣而饒州降餘干亦降元兵攻安仁至圍  
湖張孝忠戰死如旦敗走尋死之

林志

周樸字吉甫鄱陽人初從學於張采奇其才處之家塾樸以其知己事之不去時盜起江湖聞州將以采知兵使督州兵討之盜有張家僮率眾掠邑里采將攻之而賊先發遂遇害樸走告州將誓欲爲張復讎州將義之授以兵兵寡議者勸更募之樸曰我募而眾彼亦眾矣不若出不意急擊之卽擣賊所屯賊窮以金擲地兵爭取金賊脫去立斬數人以徇慷慨流涕誓不與賊俱生眾感動願效死力攻一寨破之餘寨皆走乘勝追擊斬首數千生禽僮斬之俎其心肺爲文祭其師境內賊寨數十悉平之元兵至州將唐震死之眾勸吉甫降太守可得吉甫曰吾爲師復讎而已他豈所望哉卽日散遣所部隱居不復言功名

林志

祝泌字子涇德興人以進士授饒州路三司提幹傳邵氏皇極之學於廖應淮年老乞休御書觀物樓扁額賜之元世祖詔徵不赴著有觀物解六壬大占祝氏祕鈐

府志

熊彥詩字叔雅安仁人潛心力學文鳴一時學者稱曲肱先生登進士累官至銀青光祿大夫後邑人翰林待制倪鏜奏立錦江書院以彥詩配享朱子於東序

林志

高祥字夢麟餘干人讀書悉諸經籍義理制度多發先儒所未發登咸淳進士除忠定書院山長從遊者眾築齋舍上方坪所著詩文三十卷

人物志

呂雲伸原名天孫鄱陽人咸淳閒入太學爲文不逐時好以行誼著聞後拜國子學諭嘗語人曰文由道而著

如穀粟布帛人閒不可無者又曰文要易而難不可難而易也識者稱之

人物志

元

趙介如字元道浮梁人從江萬里遊其學靜深有本宋寶祐進士通判饒州元起爲雙溪書院山長從者甚眾

人物志

馬端臨字貴與樂平人廷鸞子宋咸淳中漕試第一廷鸞與賈似道不合去國遂侍疾不與計偕入元父友留夢炎爲吏部尚書欲引之以親疾力辭廷鸞薨起爲柯山書院山長教授台州路學引年歸著有文獻通考大學集傳多識錄

人物志

黃常字仲綱樂平人登進士歷官梧州通判假禮部侍

郎使安南至承天門迎官請下馬常曰奉詔遠來當以  
禮進馳馬入承天門王長揖受詔常曰天朝以世子十  
年不入貢未欲加兵者以世子爲禮義之國乃下此詔  
受詔不拜得無愧乎王亟拜稱謝使還遷江西行省參  
知政事

人物志

葉衡字仲興德興人任興化縣尹秩滿而去民立碑頌  
之有民苦賦斂侯爲優助民苦盜賊侯爲戢捕治其吞  
併仁讓以興治其虛誕訟獄以清等語蓋非虛譽云

人物志

傅立字權甫德興人刻意學問有文名得里人祝泌皇  
極數學厯官奉政大夫致仕卒諡文懿立出入禁闥二  
十餘年眷遇加隆嘗建初庵書院以惠後學

林志



李思衍字克昌餘干人丞相巴延原作伯顏渡江遣武良弼

下饒以思衍權樂平尋授袁州治中入爲國子司業世

祖以安南未附屢遣將攻之不克召拜禮部侍郎副參

議圖嚕原作禿廬奉使招諭及至思衍曰大國之臣不拜小

國之君禮也王笑曰敬其主以及其使亦禮也遂抗禮

思衍宣諭威德辭語簡切王大敬之明日奉表款附嚕

使甚厚時圖嚕受思衍不受旣還上勞慰問所贐怒嚕

嚕受思衍曰圖嚕受安小國之心臣不受全大國之體

上賢之林志

徐明善鄱陽人至元閒任江西儒學提舉嘗奉使安南

歷聘江浙湖廣三省考試拔黃縉卿於落卷中別號方

谷人物志

周應極字南翁鄱陽人弱冠選經史授婺源學正棄官  
歸養及喪免以姚穉王約劉敏中程鉅夫薦召見獻皇  
元頌擢翰林待制調集賢司直出同知池州事無留滯  
覈賦金之羨者還民著爲例英宗踐祚以舊臣召見勞  
問呼學士不名未幾卒兄應奎字明翁任饒州路治中  
饒穀宜秬而輸以秬須轉糴他境應奎謂任土作貢屢  
請於行省得以秬輸民便之

林志

李楫字濟川鄱陽人大德閒自袁州路經歷遷臨江新  
淦州判官時朝命使者巡行郡國至臨江官吏皆受譴  
責獨稱楫善遂遣楫往安福永新糾出吏贓萬計任淦  
六年長於聽斷每得隱情委讞鄰州縣疑獄多所平反  
人稱明允終江西行省照磨

人物志

屈殷字子申鄱陽人以集賢待制李粲薦策試優等特除祕書丞乞便養改信州知事吏才明決信守王直號良吏事每咨於殷御史撒里不花張士宏考信羣吏嘉殷清苦交薦其賢

人物志

計初字遂初浮梁人授甯都州同知覈板冊以定賦出冤獄以正刑上下推服謁假歸省饑民起爲亂當道檄初往諭盜遂息禽首惡三人抵以法州久無雪民苦瘡癘復任時大雪明年旱一禱輒雨民歌曰去年雪今年雨微計侯那得此

人物志

韓光甫字炎鳳餘干人大德閒薦爲集賢

原作怯薛

未幾授

承務郎杭州路總管判官剖決疑獄築西湖隄以捍水

田遷汀州路同知循州知府

人物志

齊大同字周卿樂平人皇慶初議頒朔安南特遣往國

王設宴明霞閣酒酣索詩援筆立成安南主臣敬嘆使

還授龜盈州同知稱疾南還

人物志

吳存字仲退鄱陽人自少力學有卓識部使者勸以仕

不答延祐元年設科取士牒上無存名總管史烜曰不

可無吳先生強起之果中選授本路學正任不及代歸

調甯國路學教授未久引年去任七年聘主本省鄉試

至元五年卒於家所著有程朱易傳本義折衷月灣詩

集

林志謹案史簡編鄱陽五家集一即吳存一黎廷瑞字仲宋度宗朝進士迪功郎肇慶參軍一徐瑞

字山玉入元為山長一葉蘭一劉炳俱有傳附見二家一為蘭父懋一為瑞從子攸附識於此

胡至仁餘干人延祐進士學有淵源從饒魯游博洽淹

貫踐履純篤判樂平州致仕教授生徒臨川李實上饒

王觀進賢胡棣皆其門人世稱為弋溪先生

人物志

李存字明遠安仁人延祐初一試不第遂杜門著書祕

書李孝光舉以自代不果用葺書室曰俟齋人稱鄱陽

先生有修齋集三十卷

人物志

高驥字馴良餘干人天性敏異學問該博延祐西省堂

試授瑞昌儒學教諭既而以易舉進士不仕日與弟寄

興詩酒有詩文若干卷臨川虞集金華黃縉爲之序

人物志

葉志道字士心德興人受學於劉靜修事母至孝母歿

廬墓側有馴虎鳥巢之瑞事聞旌其門更徵之不起歐

陽元廬摯有詩美之

安志謝志舊案安志孝義傳尚有餘干艾易萬傳

史樞鄱陽人有孝行嘗天旱井竭親思水莫能得樞對

井號泣須臾泉出清冽馨香人以爲孝感

安志

吳正道餘干人明六經許慎說文有不足者補之臨川  
吳澄嘗問曰楷模二字假借乎曰取義也淮南子草木  
譜云模木生周公冢其色正楷木生孔子冢其葉直若  
正與直可爲法則況在聖人之冢乎澄大敬之有六書  
原六書通正六書淵源圖澄爲之序

人物志

朱公遷字克升樂平人至正初徵至京師授翰林直學  
士院勸帝親賢遠佞修德卹民諸事當國者惡其切直  
章七上出爲金華學正於經傳百家之書禮樂律厯制  
度文物之數無不通貫悉究用力於聖賢之道從學者  
常數百人學士黃潛一見特加敬愛稱其道德文章卓  
然名世著有詩經疏義

林志

湯自願字伯恭餘干人至正閒斬黃項普壽陷饒州所  
至殺掠慘酷自願起兵未幾州陷挾諸弟姪走港西習  
泰鄉率章黼黃士龍等結連臨川諸義士相爲保障其  
弟姪皆有膂力每戰必捷聲大振時號湯軍九月集兵  
復州治三日戰敗自願遭禽送饒州普壽欲其降不屈  
死

人物志

李棠卿樂平人任無錫倉使張士誠入無錫棠卿遣人  
懷印閒道納之行省尋被執棠卿顏色自若士誠曰殺  
之成其名乃囚繫倉所發憤卒

林志

朱公選字克用樂平人事順帝累官憲副明兵至元主  
集三宮議避兵北行趙巴延布哈原作伯慟哭諫曰天  
下者世祖之天下陛下當以死守奈何棄之不聽夜半

開門北奔公選亦以疏留弗獲遂自刃

人物志

汪伯正字以德樂平人少通春秋大義尙節氣至正戊子冬方谷珍聚眾海上伯正謁轅門備陳禦賊方略充參謀軍事督攝海上左翼部伍與賊對壘大小七戰谷珍敗北錄功授婺源州判官壬辰徐壽輝遣僞將項普壽略陷饒信新安詔伯正拒之五月紅巾周伯顏來陷饒徽伯正引兵自五嶺與平章三旦入合平南兵勦之平南兵多北人不便險阻爲紅巾所邀三旦入僅以身免賊乘勝長驅入州伯正力戰死

人物志

李士會字有元樂平人少慧敏力學汎極古今子史百家而歸宿於六經文軌先秦兩漢以樂平起漢建安迄宋德祐上下千載無紀事者由是專意邑乘聞前輩有



能道邑中前事不憚百里往咨之楊簡曹彥約俱嘗尹是邑遺愛在民心則走江浙訪及子孫盡得其當時施設政教之實風鈔雪纂成樂平廣記三十卷邑人物始有據待制李粲稱其紀述備考嚴精筆削嚴可方古史云

人物志

劉明字表明鄱陽人斬兵寇饒明糾集鄉民以義勇相保守官軍東來明爲鄉導克復郡邑運糧開道遇賊力戰錄功授浮梁州判從征信陽病亟論左右曰所恨者殘寇未滅不能盡忠於國耳言訖而逝

人物志

夏璿字希政德興人至正閒官湖廣行省都事兵至被禽不屈死之明興以孫原吉貴贈少師戶部尚書

林志

倪鏜字仲瑤安仁人博學宏才應文學選任南康路教

授遷翰林待制再遷晉甯知州有惠政奏立錦江書院

以淑鄉之後學

林志

徐杰字杰之浮梁人幼以穎悟稱長益肆學問薦授象

山書院山長學士盧摯稱之曰南州高士舉充江西儒

學提舉中書左丞善徇薦其才授詹事院賓客說書

林志

徐嘉言字尚友德興人幼明敏嗜學尤長於春秋與兄

芳谷齊名時稱二徐仕婺州學改饒州路教授未幾解

冠去所著有春秋原旨三傳辨疑史隱集

人物志

程炎字伯圭德興人父龍斗宋咸淳進士官上饒主簿

因先塋在邑之蛟塘自署曰蛟塘子炎讀書務臻實踐

與胡雲峯鄉季友徐廷玉往還講習著有易經注義書

經注義書

豫章

屈任字濟民鄱陽人元末紅巾倡亂任與弟直中暨同里操宗義輩糾集鄉民保障寇至挺身抗鋒鏑力屈被禽賊帥迫之從任曰棄母之養從汝強賊天地神祇所不容賊帥曰義士也釋之

人物志

葉蘭字楚庭鄱陽人父懋嘉興路總管蘭任太常寺禮儀院奉禮明太祖初立周伯琦應召以其名薦蘭曰吾世爲元臣義不可仕弗就赴河石橋水以死

人物志四庫提要

胡振祖字振卿鄱陽人至正壬辰兵起倡義禦之迎平章三旦入元帥韓彥邦軍爲嚮導遂復饒以功轉倅本路踰年斬兵復至力戰被禽誘以降振祖曰吾爲國以義保民身可死膝不可屈因紕寇置酒邀酌至微酣奪戟刺殺數人而死

豫章書

邱省字公省餘干人至正閒淮兵入境父被禽省以木

椎追之擊死數人父得脫省死於賊

至正南昌  
死義傳

許則祖字天則樂平人性剛居常習武事嘗歎曰大丈夫

當死國難至正閒兵起剽掠則祖倡義兵誓曰從令

者賞犯令者誅克復德興踰年兵復來號數十萬則祖

戰連捷乘勝追之馬陷渾泥中遂遇害事聞賜諡忠顯

至正南昌  
死義傳

王銓字伯衡安仁人登進士歷官温州守時郡受兵銓

被執不屈死其妻聞之亦抱子赴水自溺

至正南昌  
死義傳

黃復圭字均瑞安仁人博學以詩鳴至正兵起復圭陷

賊庭爲詩罵之賊怒將剖其腹罵曰腹可剖赤心不可

剖遂死之

至正南昌  
死義傳



士除兵部侍郎與貢師泰同擢監察御史兩人皆南士之望一時榮之遷崇文太監兼經筵官出爲江東肅政廉訪使長槍索諾木巴勒陷甯國伯琦與僚佐倉皇出走至杭州除兵部尚書改浙西肅政廉訪使丞相達實特穆爾承制假伯琦參知政事招諭平江張士誠留平江者十餘年士誠旣滅伯琦乃得歸鄱陽尋卒伯琦儀觀溫雅粹然如玉雖遭時多艱而善於自保博學工文章而尤以篆隸眞草擅名當時嘗著六書正譌說文字原二書又有詩文彙若干卷

史元

蔡深字淵仲樂平人以春秋中浙江鄉試授柯山書院山長轉徽州學教授值時多難歸不復起明初訪求宿學饒守陶安首薦詣公車以疾懇辭已西江西設科舉

藩省禮致司文衡得金谿吳伯宗發解廷對狀元及第

人咸服其識鑑

人物志

徐素字淡如先籍餘干元末兵起挈家饒城遂爲鄱陽人性穎學博邃於易禮楷書得歐陽率更顏魯公法明初郡守陶安重之每公暇則延素咨諏民俗素傾心無

隱爲文善敘事著澹湖集十卷

人物志

吳汝字國棟饒州人至正閒戍紮城大水隄盡決悉力載石巨舫塞之徐壽輝倡亂破邾下武漢諸城汝起兵復武昌僞漢遁後飲黃鶴樓爲漢兵襲破率其麾下渡江以圖興復不克死之部將黃榮劉戶沈權等統眾還饒州明太祖與陳友諒戰鄱陽黃榮以兵從榮稱戰時見汝神助敕封護國忠臣顯靈王邾民立祠祀之

湖廣通志

江西通志卷一百六十一